

ԵՐԱԿՐՈՆԵԱ ԿԱՅԱԿՐԱՆ

ՄԱՅՐ ԱԹՈՒ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց



Հուլիսի 7-ին

«Սուրբ Էջմիածինը մեր հավատքի ծննդավայր» համահայկական ուխտագնացության մասնակիցներին

Ն. Ս. Օ. Տ. Տ. Քարեգին Երկրորդ Ծայրագույն Պատրիարք եւ Ամենայն Հայոց Կաթողիկոսն ընդունեց հուլիսի 5–10-ը Հայաստանում անցկացվող «Սուրբ Էջմիածինը մեր հավատքի ծննդավայր» համահայկական ուխտագնացության մասնակիցներին:

Ուխտագնացությունը կազմակերպել էր Հայ Եկեղեցու համաշխարհային երիտասարդական միավորումը (ՀԵՅԵՄ):

Հանդիպմանը ՀԵՅԵՄ-ի հոգեւոր տեսուչ եւ Կենտրոնական գրասենյակի տնօրեն Տ. Թովմա վրդ. Խաչատրյանը, հայցելով Վեհափառ Հայրապետի օրհնությունը, ներկայացրեց ուխտագնացության ծրագիրը եւ տեղեկացրեց, որ համահայկական ուխտագնացությանը մասնակցում է շուրջ 150 երիտասարդ՝ նվիրապետական աթոռներից, հայրապետական պատվիրակություններից, Հայաստանի, Արցախի եւ Սփյուռքի տարբեր թեմերից:

Ներկայությունը ողջունեց նաեւ ՀԵՅԵՄ-ի հոգեւոր առաջնորդ, ԱՄՆ-ի հայոց արեւմտյան թեմի առաջնորդ Տ. Հովնան արք. Տերտերյանը՝ արձանագրելով, որ եկեղեցասեր երիտասարդներն անցյալը գալիքի հետ կապող ոսկե կամուրջ են եւ այսօր եկել են նորոգվելու Սուրբ Էջմիածնի խորհրդով ու ստանալու Ամենայն Հայոց Կաթողիկոսի հայրական օրհնությունը:

Այնուհետեւ երիտասարդներին իր պատգամը փոխանցեց Հայոց Հայրապետը՝ ուրախություն հայտնելով աշխարհասփյուռ հայ երիտասարդներին Մայր Աթոռ Սուրբ Էջմիածնում համախմբված տեսնելու առիթով:

Նորին Սրբությունն ընդգծեց, որ խորհրդանշական է համահայկական ուխտագնացության խորագիրը՝ «Սուրբ Էջմիածինը մեր հավատքի ծննդավայր», քանի որ այս տարի լրանում է Մայր տաճարի հիմնադրման 1720-ամյակը:

«Սուրբ Էջմիածինն Աստծու շնորհն է եւ պարգևը, որ սնուցել է մեր ժողովրդին հավատք, որով եւ կերտվել են հայի ինքնությունը, նկարագիրն ու ոգին, ազգային

ու հոգեւոր ողջ արժեհամակարգը»,– մշեց Ամենայն Հայոց Կաթողիկոսը՝ հաստատելով, որ քրիստոնեական զորեղ հավատքի շնորհիվ հայ ժողովրդի զավակները կարողացել են դիմագրավել իրենց առջեւ ծառացած բոլոր դժվարություններն ու փորձությունները:

Այս առնչությամբ Նորին Սրբությունն ընդգծեց, որ հայ ժողովուրդն այսօր եւս շարունակում է հանուն հավատի եւ հայրենիքի պայքարել տարատեսակ մարտահրավերների դեմ, ինչպիսիք են համաշխարհայնացումը, հոգեւոր, բարոյական օտարամուտ արժեքները, Արցախի շրջափակումը, հայրենյաց սահմանների նկատմամբ աղբյւրեղանական ուսմանությունները եւ ազգի անվտանգային խնդիրները:

Ամենայն Հայոց Կաթողիկոսը հորդորեց ուխտավոր երիտասարդներին, որ յուրաքանչյուրն իր երկրում ձայն բարձրացնի արցախահայության ազատ եւ անկախ կյանքի իրավունքի պաշտպանության, ինչպես նաեւ Ադրբեջանի ծավալապաշտական նկրտումների կանխարգելման համար: Հայոց Հայրապետը պատգամեց հայրդիներին, որ չթերագնահատեն իրենց կարողությունները եւ երիտասարդական ավյունով ջանքեր գործադրեն ի խնդիր հայրենիքի զորացման ու շենացման եւ ի նպաստ կարիքի մեջ գտնվող ազգի զավակների: Նորին Սրբությունն ուխտավորներին հորդորեց նաեւ ամխաթար պահել ազգային, հոգեւոր ու բարոյական արժեհամակարգը, ինչպես նաեւ մեր հայրերից ժառանգած ավանդություններն ու սրբությունները:

Հանդիպման ընթացքում Ամենայն Հայոց Կաթողիկոսն իր գնահատանքը հայտնեց ուխտագնացության նախաձեռնողներին՝ ՀԵՅԵՄ-ի հոգեւոր առաջնորդ Տ. Հովնան արք. Տերտերյանին ու ՀԵՅԵՄ-ի հոգեւոր տեսուչ եւ Կենտրոնական գրասենյակի տնօրեն Տ. Թովմա վրդ. Խաչատրյանին՝ երիտասարդական միությունների հետ աշխատանքներն առավել արդյունավետ կազ-

մակերպելու եւ հայրենաշեն ծրագրերին աջակցելու համար: Հայոց Հայրապետը նաեւ իր օրհնությունը բերեց թեմակալ բոլոր առաջնորդներին, որոնք քաջալերում, խրախուսում եւ հովանավորում են երիտա-

սարդաց միությունների եկեղեցաձայն առաքելությունը: Վերջում Հայոց Հայրապետը ուխտավոր հայրդիներին մաղթեց, որ Տերն ունկնդիր լինի նրանց խնդրանքներին եւ նորոգի ու զորացնի նրանց ուխտը:



Հուլիսի 9-ին

Հայաստանի 6-րդ միջազգային բժշկական համագումարի մասնակիցներին

Ամենայն Հայոց Կաթողիկոսն ընդունեց Հայաստանի 6-րդ միջազգային բժշկական համագումարի մի խումբ մասնակիցներին՝ ուղեկցությամբ համագումարի պատվավոր նախագահ բժշկական գիտ. դոկտոր, պրոֆեսոր Արա Բաբլոյանի:

Հանդիպմանն Արա Բաբլոյանը, Ամենայն Հայոց Կաթողիկոսին ներկայացնելով համագումարի մասնակիցներին, տեղեկություններ փոխանցեց համագումարի աշխատանքների եւ արձանագրված արդյունքների վերաբերյալ:

Պրոֆեսոր Ա. Բաբլոյանն ընդգծեց, որ համագումարին իրենց գործուն մասնակցությունն են հեռավար բերել նաեւ Արցախի բժիշկները՝ անդրադարձ կատարելով Արցախում առկա հումանիտար ճգնաժամին:

Իր օրհնությունը փոխանցելով ներկայներին՝ Վեհափառ Հայրապետը կարեւորեց հայրենիքում համագումարի կապակցությամբ աշխարհասփյուռ հայ բժիշկների մեկտեղումը, որով իրենց կաւորումը նպաստն են բերում Հայաստանում առողջապահության զարգացման գործին: Հայոց Հայրապետը գովել է խրախուսե-

լի նկատեց նման միջոցառումների անցկացումն ու բժիշկների միջեւ մասնագիտական փորձի փոխանակումը՝ ի նպաստ հայրենիքում առողջապահական նոր մշակույթի ձեւավորման եւ բժշկագիտության զարգացման:

Անդրադառնալով Արցախի շրջափակման հետեւանքով առաջացած հումանիտար եւ առողջապահական ճգնաժամին՝ Հայոց Հայրապետը կարեւորեց սփյուռքահայ բժիշկների հետեւողական աշխատանքն իրենց երկրներում գործող բժիշկների հետ համախումբ պաշտպանելու Արցախում ապրող հայրդիների անվտանգ կյանքի եւ ազատ ու անկախ ապրելու իրավունքը:

Վերջում Ամենայն Հայոց Կաթողիկոսը համագումարի մասնակից բժիշկների առաքելությանը մաղթեց բարի արդյունավորում՝ պատգամելով ամենօրյա գործունեության ընթացքում առաջնային տեղ հատկացնել հայրենիքի առջեւ ծառացած գոյաբանական եւ անվտանգային խնդիրների ու մարտահրավերների հաղթահարմանը:

ՀԲԸՄ-ի տարբեր ծրագրերի սփյուռքահայ երիտասարդներին

Ամենայն Հայոց Կաթողիկոսն ընդունեց Հայկական բարեգործական ընդհանուր միության (ՀԲԸՄ) «Գլոբալ առաջնորդության» եւ «Երաժշտական Հայաստան» ծրագրերի մասնակից սփյուռքահայ երիտասարդ ուսա-

նողներին ու երաժիշտներին, ինչպես նաեւ Սոմերալի (Կանադա) սկստուական խմբին՝ ուղեկցությամբ ՀԲԸՄ-ի Հայաստանի նախագահ, ՀԲԸՄ-ի Կենտրոնական վարչության անդամ Վազգեն Յակոբյանի: ➔ էջ 2

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ

Ամենայն Հայոց Կաթողիկոսն ընդունեց



ՀԲԸՄ-ի տարբեր ծրագրերի սփյուռքահայ երիտասարդներին

← էջ 1

Հանդիպմանը տիար Վ. Յակուբյանը Նորին Սրբությանը տեղեկացրեց, որ շուրջ 35 սփյուռքահայ երիտասարդ Հայաստան է ժամանել՝ հարստացնելու իր գիտելիքները հայոց լեզվի, հայկական երգարվեստի բնագավառներում, ի մոտո ծանոթանալու հայկական մշակույթին ու պատմությանը, զորացնելու իր կապը մայր հայրենիքի հետ: Հայոց Հայրապետը, իր գնահատանքը բերելով ՀԲԸՄ-ին նման նախաձեռնության համար, կարելու նկատեց Սփյուռքի երիտասարդ հայորդիների այցը Հայաստան հատկապես այս դժվարին օրերին, որպեսզի վերջիններս հաղորդակից լինեն ոչ միայն հայրենիքի հոգեւոր ու մշակութային արժեքներին, այլ նաեւ երկրում տիրող իրավիճակին, Արցախում ստեղծված հումանիտար ճգնաժամին եւ առկա անվտանգային խնդիրներին: Նորին Սրբությունը այս առնչությամբ հորդորեց երիտասարդներին հայրենասիրական զգացումի մոր լիցքերով քաջալերված վերադառնալ իրենց երկրներ եւ նախանձախնդրորեն ամեն ջանք ի գործ դնել նպաստելու հայ ժողովրդի առջեւ ծառացած մարտահրավերների հաղթահարմանը:

Նորին Սրբությունը պատգամեց, որ հայորդիներն իրենց գիտելիքներով եւ երիտասարդական ավյունով աջակցեն իրենց համայնքների առավել զորացմանն ու միասնականության կերտմանը՝ ազգային ինքնությունը պահպանելու եւ հայրենիքին օգտաշատ ծառայություն բերելու համար:

Հանդիպման ընթացքում Ամենայն Հայոց Կաթողիկոսը պատասխանեց նաեւ սփյուռքահայ երիտասարդների հարցերին, որոնք առնչվում էին հայկական համայնքներում, Արցախում եւ Հայաստանում առկա դժվարությունների հաղթահարման ուղիներին:

Վերջում Նորին Սրբությունը Պահպանիչ աղոթքով օրհնեց հայորդիներին:



Հուլիսի 11-ին

ԱՄՆ հայոց արեւելյան թեմի ուխտավորներին

Ամենայն Հայոց Կաթողիկոսն ընդունեց ԱՄՆ հայոց արեւելյան թեմի ուխտավորներին՝ ուղեկցությամբ Նյու Յորքի Ս. Գրիգոր Լուսավորիչ եկեղեցու հոգեւոր հովիվ Ս. Մեսրոպ քին. Հովսեփյանի եւ Չիկագոյի Ս. Գրիգոր Լուսավորիչ եկեղեցու հոգեւոր հովիվ Ս. Անդրեաս քին. Կարապետյանի:

Տեր Մեսրոպը, հայցելով Նորին Սրբության օրհնությունը, ներկայացրեց ուխտավորաբար Մայր Աթոռ ժամանած հավատացյալներին:

Վեհափառ Հայրապետն իր սերն ու օրհնությունը բերեց ուխտավորներին, իր գնահատանքը փոխանցեց հոգեւոր հովիվներին՝ արդյունավետ սպասավորության համար:

Ամենայն Հայոց Կաթողիկոսը կարեւորեց հայրենիքի համար այս ծանր օրերին աշխարհասփյուռ հայոց թեմերից նման ուխտագնացությունների կազմակերպումը, ինչը հնարավորություն է ընձեռում հաղորդ

դառնալու Հայաստանում եւ Արցախում առկա մարտահրավերներին: Այս առնչությամբ Նորին Սրբությունը հորդորեց ԱՄՆ հայոց արեւելյան թեմի ուխտավորներին իրենց երկրում բարձրաձայնել Արցախում եւ Հայաստանում տիրող իրավիճակի մասին, հետեւողական ջանքեր գործադրել արցախահայության անվտանգ կյանքի, ազատ ու անկախ ապրելու իրավունքի պաշտպանության համար:

Ամենայն Հայոց Կաթողիկոսը նաեւ պատգամեց ուխտավորներին աջակից եւ գորակից լինել իրենց հոգեւոր հովիվներին, ճիգ ու ջանք չխնայել ի նպաստ իրենց համայնքների զորացման, երիտասարդ սերնդի ազգային ինքնության պահպանության:

Վերջում Հայոց Հայրապետը պատասխանեց ուխտավորների հարցերին, որոնք վերաբերում էին Հայաստանում եւ Արցախում առկա մարտահրավերների հաղթահարմանը:

Հուլիսի 12-ին

Վատիկանի պետքարտուղարին

Ամենայն Հայոց Կաթողիկոսն ընդունեց Վատիկանի պետքարտուղար կարդինալ Պետրո Պարոլինին:

Հանդիպմանը ներկա էին Մայր Աթոռի արտաքին հարաբերությունների արարողակարգի բաժնի տնօրեն Ս. Նաթան արք. Հովհաննիսյանը, Վատիկանում Ամենայն Հայոց Կաթողիկոսի ներկայացուցիչ Ս. Խաժակ արք. Պարսամյանը, Վատիկանում Հայաստանի Հանրապետության արտակարգ եւ լիազոր դեսպան Կարեն Նազարյանը եւ Սուրբ Աթոռի առաքելական նվիրակ արք. Ժոզե Ավելինո Բետանկուրը:

Ողջունելով Սուրբ Աթոռի պետքարտուղարին հայոց հոգեւոր կենտրոնում՝ Նորին Սրբությունը կարեւորեց վերջինիս այցը տարածաշրջան եւ իր գոհունակությունը հայտնեց Հայաստանի ու Արցախի առջեւ ծառացած մարտահրավերների հաղթահարմանն ի նպաստ ներդրվող ջանքերի համար:

Հանդիպմանը Վեհափառ Հայրապետը, անդրադառնալով Արցախի շրջափակմանը եւ ստեղծված հումանիտար աղետին, Հայաստանի առջեւ ծառացած անվտանգային խնդիրներին, կարեւորեց միջազգային հանրության գործնական միջամտությունը՝ կասեցնելու Ադրբեջանի ծավալապաշտական նկրտումները, հարձակողական գործողությունները եւ պաշտպանելու արցախահայության ինքնորոշման իրավունքը:

Իր հերթին պետքարտուղար կարդինալ Պետրո Պարոլինը Հայոց Հովվապետին փոխանցեց Հռոմի Սրբազան Քահանայապետ Ֆրանցիսկոս պապի եղբայրական ողջույնը՝ ընդգծելով, որ Սուրբ Աթոռի դիվանա-



գիտական մշտական ներկայացուցչության բացումը Երեսնում կնպաստի Վատիկանի եւ Մայր Աթոռի միջեւ փոխգործակցության առավել սերտացմանը:

Անդրադառնալով տարածաշրջան իր այցին՝ պետքարտուղարը նշեց, որ այն կրում է հումանիտար բնույթ եւ նպատակ է հետապնդում նպաստելու Հայաստանի ու Ադրբեջանի միջեւ հակամարտության խաղաղ կարգավորմանը: Կարդինալ Պետրո Պարոլինը նշեց, որ վերջնական խաղաղության հասնելու գործընթացը բարդ է, քանի որ կան բազմաթիվ խոչընդոտներ, եւ այս առումով սպասված արդյունքներ դեռ չեն արձանագրվել:

Զրույցի ընթացքում Ամենայն Հայոց Կաթողիկոսն իր երախտագիտությունը հայտնեց Սուրբ Աթոռի եւ Հռոմի Սրբազան Քահանայապետի՝ Հայաստանին եւ հայ ժողովրդին դժվարին այս շրջանում ցուցաբերած զորակցության եւ աջակցության համար, ինչպես նաեւ իր եղբայրական ողջույնն ու բարեմաղթանքները փոխանցեց Ֆրանցիսկոս պապին:



Հուլիսի 13-ին

«Ֆրանսիայի հայ երիտասարդություն» ընկերակցության անդամներին

Ամենայն Հայոց Կաթողիկոսն ընդունեց Մարսել քաղաքի «Ֆրանսիայի հայ երիտասարդություն» (JAF) ընկերակցության անդամներին՝ ուղեկցությամբ խմբի ղեկավար պարոն Շամսայանի եւ տիկին Լուսինե Մելիքյանի:

Հանդիպմանը պարոն Պասկալ Շամսայանը Նորին Սրբությանը ներկայացրեց Հայաստանում ընկերակցության մշակութային, կրթական եւ սոցիալական ծրագրերը՝ կարեւորելով նաեւ երիտասարդ հայորդիների՝ հայրենիքում տիրող իրավիճակին ի մոտո ծանոթանալու հնարավորությունը:

Ամենայն Հայոց Կաթողիկոսը, իր գնահատանքը բերելով «Ֆրանսիայի հայ երիտասարդություն» ընկերակցության վարչության անդամներին, ուսուցիչներին եւ ղեկավարին՝ հայ երիտասարդությանը հա-

մախմբելու գովաբան ծառայության համար, անդրադարձավ ընկերակցություն կատարած իր այցելությանը եւ այն կարեւոր ջանքերին, որ գործադրվում են մատաղ սերնդին հայեցի կրթելու եւ դաստիարակելու ուղղությամբ:

Նորին Սրբությունը հույս հայտնեց, որ երիտասարդները, հայրենասիրական զգացումի մոր լիցքերով քաջալերված՝ վերադառնալով իրենց երկիր, առավել մեծ նախանձախնդրությամբ կշարունակեն նպաստել Մարսելի հայկական համայնքի զորացմանն ու առաջընթացին: Ամենայն Հայոց Կաթողիկոսը երիտասարդ հայորդիներին հորդորեց նաեւ լինել հայ ազգի արժանավոր զավակներ, սիրել հայրենիքն ու եկեղեցին, որպեսզի կարողանան պահպանել ազգային ինքնությունը:

Քահանայական ձեռնադրություն

Նույսի 16-ին Հիսուս Քրիստոսի պայծառակերպության տոնին, Սյունյաց թեմի առաջնորդանիստ Ս. Գրիգոր Լուսավորիչ եկեղեցուն (ք. Գորիս), Ն. Ս. Օ. Ս. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսի օրհնությամբ, սուրբ պատարագի ընթացքում կատարվեց քահանայական ձեռնադրություն:

Պատարագիչն էր Մայր Աթոռ Սուրբ Էջմիածնի «Գարեգին Ա» կրթական կենտրոնի տնօրեն Ս. Վահան Եպս. Հովհաննիսյանը, որի ձեռամբ քահանայական ձեռնադրություն եւ օծում ստացավ Մայր Աթոռի տարբեր կառույցներում ու թեմերում սպասավորող երեք սարկավագ: Սուրբ պատարագի ընթացքում Վահան սրբազանը, քահանայության կոչելով նորընծաներին, սրբալույս մյուռոնով օծեց նրանց ճակատներն ու ձեռքերը, ինչպես նաեւ նորածն եկեղեցականներին շնորհեց հոգեւոր նոր անուններ:

Գետրոգ սրկ. Կաղեյանը վերակոչվեց Տեր Պետրոս քահանա, Դավիթ սրկ. Սահակյանը՝ Տ. Սովսե քահանա, իսկ Արմեն սրկ. Իսահակյանը՝ Տ. Հակոբոս քահանա: Այնուհետեւ նորածն քահանաներն իրենց անդրանիկ օրհնությունը փոխանցեցին ներկայներին:

Սրբազան հայրը, իր քարոզում անդրադառնալով Հիսուս Քրիստոսի պայծառակերպության տոնին, ի մասնավորի նշեց. «Պայծառակերպությամբ Քրիստոս Իր աստվածությունն է հայտնում մեզ եւ մխթարում այն խորհրդով, որ մեր հավատքի հիմնադիրը պարզ վարդապետ, մարգարե կամ հրաշագործ մի անձ չէ, այլ նույն Ինքը՝ Աստված: Քրիստոս մարմնացյալ Աստված է, որ երկնքից խոնարհվեց եւ բնակվեց մարդկանց մեջ. դրա համար Նրան կոչեցին Եմմանուել, որ նշանակում է Աստված մեզ հետ»:

Վահան Եպիսկոպոսը նաեւ ընդգծեց, որ Պայծառակերպության տոնը հրավեր է քրիստոնյաներին լինելու Աստծու ներկայության մեջ:

Դիմելով նորածն քահանա հայրերին՝ սրբազան հայրը հորդորեց լինել մշակներ՝ առանց ամոթի, ամուր՝ իրենց քահանայագործության, քաջ՝ փորձությունների մեջ:

Վերջում պատարագիչ սրբազանը պատգամեց ժողովրդին՝ մեցուկ եւ զորավիգ լինել քահանաներին՝ Հայաստանյայց Առաքելական Սուրբ Եկեղեցու առաքելության զորացման համար:

«Ողջույնի» ժամանակ ներկա հոգեւոր



դասը բարձրացավ Սուրբ խորան եւ շնորհավորեց նորածն քահանաներին՝ համբուրելով նրանց մյուռոնադրոշմ ճակատներն ու ձեռքերը:

Մայր Աթոռ Սուրբ Էջմիածնում քառասունյա պատրաստության շրջանից հետո նորընծա քահանաները ծառայության

կոչվեցին Հայաստանյայց Առաքելական Սուրբ Եկեղեցու տարբեր թեմերում եւ կառույցներում:

Լրատվական նյութերը՝ Մայր Աթոռ Սուրբ Էջմիածնի տեղեկատվական համակարգի

✦ ՄՅՈՒՌՈՆՈՐԶՆՈՒԹՅԱՆ ՈՐՈՇ ԴՐՎԱԳՆԵՐ

Գարեգին Բ Ներսիսյանի հայրապետության շրջան



Ն. Ս. Օ. Ս. Տ. Գարեգին Բ Ամենայն Հայոց Կաթողիկոսին էր վիճակված 2001 թ. կատարելու սկսվող՝ երրորդ հազարամյակի եւ Հայաստանում քրիստոնեության պետականորեն ընդունման ԺԷ հարյուրամյակի առաջին մյուռնոսօրինությունը: Այս արարողությունն իր համահայկական, միջազգային եւ միջեկեղեցական ընդգրկմամբ նմանը չի ունեցել Հայոց Եկեղեցու պատմության մեջ՝ Արածանիում լուսավորչափեղ մյուռնոսից հետո դառնալով մյուռնոսը 1700-ամյակի (տե՛ս «Սրբալույս մյուռնոսի օրհնություն Մայր Աթոռ Սուրբ Էջմիածնում», «Էջմիածին», 2001, Թ, էջ 41):

Հաջորդ օրհնությունը 2008 թ. սեպտեմբերի 28-ին էր, սակայն նախքան այդ՝ սեպտեմբերի 14-ին՝ Խաչվերացի տոնի երեկոյան, Մայր Աթոռ Ս. Էջմիածնում Գարեգին Բ Ամենայն Հայոց Կաթողիկոսի հանդիսապետությամբ տեղի ունեցավ Անդաստանի արարողություն, որին հաջորդեց սրբալույս մյուռնոսի ծաղկանց նյութերի օրհնությունը: Վարագա Սուրբ Խաչի տոնի առավոտյան, հանդիսապետությամբ Վեհափառ Հայրապետի եւ մասնակցությամբ Կ. Պոլսի Տիեզերական Պատրիարք Նորին Ամենապատվություն Բարդուղիմեոս Ա-ի, մյուռնոսօրհնության առիթով Սուրբ Էջմիածին ժամանած թեմակալ առաջնորդների, ազգային բարերարների, քույր եկեղեցիների ներկայացուցիչների, ուխտավոր բազմաթիվ հայորդիների, հանդիսավոր սուրբ պատարագ մատուցվեց Միածնաէջ Մայր տաճարում: Սուրբ պատարագի ավարտին մյուռնոսի կաթսայի առջեւ կատարվեց ձիթայուղի օրհնության վերջին աղոթքը, որից հետո Մայր տաճարի զանգերի ղողանջների, ինչպես նաեւ սաղմոսների ու շարականների երգեցողության ներ-

քո սրբալույս մյուռնոսի կաթսան տեղափոխվեց Ս. Տրդատի բաց խորան: «Հրաշափառի» երգեցողության եւ Մայր տաճարի զանգերի ավետաբեր ղողանջների, հազարավոր հավատացյալների բազմության ծափողջույնների ներքո հայրապետական շքեղաշուք թափորը խաչվառներով եւ խաչերով Մայր տաճարից շարժվեց դեպի Բաց խորան: Մինչեւ ուշ երեկո աշխարհի չորս ծագերից ժամանած բազմաթիվ ուխտավոր հայորդիներ շարունակ այցելում էին Մայր Աթոռ՝ հպվելու մյուռնոսի կաթսային եւ ստանալու նոր մյուռնոսի օրհնությունը (տե՛ս «Մայր Աթոռ Սուրբ Էջմիածնում Ամենայն Հայոց Կաթողիկոսն օրհնեց սրբալույս մյուռնոսը», «Էջմիածին», 2008, Թ, էջ 18–20):

2008 թ. հետո մյուռնոս օրհնվել է 2015 թ. սեպտեմբերի 27-ին: Ինչպես նախորդները, այս օրհնությունը եւս կատարվել է հազարավոր ուխտավորների ներկայությամբ: 2015 թ. նաեւ Հայոց ցեղասպանության մահադատների 100-րդ տարելիցն էր, ուստի Գարեգին Բ Ամենայն Հայոց Կաթողիկոսը սրբազալ մահադատների բարեխոսության հայցով օրհնված մյուռնոսը կոչեց «Հաղթության մյուռնոս» (տե՛ս *Ոսկան քինյ. Յովհաննիսեան*, Յաղթութեան միւռնոս, «Էջմիածին», 2015, Թ, էջ 6):

2023 թ. հունիսի 5–8-ը Մայր Աթոռ Սուրբ Էջմիածնում տեղի ունեցած Գերագույն հոգեւոր խորհրդի ժողովը որոշեց մյուռնոսօրհնություն կազմակերպել այս թվականի հոկտեմբերի 1-ին՝ Վարագա Սուրբ Խաչի տոնի օրը («ՔՀ», 2023, հունիս Ա, թիվ 11, էջ 1), որը կլինի Գարեգին Բ Ամենայն Հայոց Կաթողիկոսի մյուռնոսի չորրորդ օրհնությունը:

Արամայիս սրկ. ԱԶԻՉՅԱՆ

Հայ եկեղեցին եւ արեւելահայ դպրոցը ԺԺ դարի երկրորդ կեսին

Սկիզբը՝ 2022-ի թիվ 23, 2023-ի թիվ 2–3

«Յաղագս ուսման» գլխում ասվում է, որ հայոց եկեղեցական-ծխական դպրոցները պետք է առանձին ծրագիր ունենան, առարկաները պետք է դասավանդվեն հայերեն, իսկ ռուսերենի վերաբերյալ Մաղաքիա արք. Օրմանյանը գրում է. «....ռուսերենն պարտաւորիչ ընել, Ռուսիոյ պատմութիւնն ու աշխարհագրութիւնը ռուսերեն աւանդել եւ վարժարանները կառավարական պաշտօնէից քննութեան ենթարկել...» (Ս. արք. Օրմանեան, Ազգապատում, հտ. Գ, Ս. Էջմիածին, 2001, էջ 5217): Հակառակ այս ամենի՝ ըստ «Արծազանքի» աշխատակից Ն. Տեր-Ղեւոնդյանի՝ դպրոցական կրթության լեզուն պետք է լինի աշխարհաբարը. «Աշխարհաբարը պիտի լինի հիմը, ուսանելի լեզուն, իսկ գրաբարը եւ նորա հետ էլ զավառական բարբառների ուսումնա-

սիրությունը պիտի երկրորդական տեղը բռնեն եւ գլխավորին ծառայեն: Ահա սրա մեջն է ուսումնարանի գործությունը լեզվի կազմակերպության եւ աճման վերաբերությամբ» (Ս. Մխիթարյան, XIX դարի երկրորդ կեսի արեւելահայ պարբերական մամուլի պատմությունից, Երևան, 1976, էջ 268): «Յաղագս մանկավարժական խորհրդոյ» գլխում նշվում է, որ մանկավարժական խորհուրդը, մի շարք հարցերից բացի, պետք է զբաղվի դասագրքերի, գրադարանի համար անհրաժեշտ մատյանների ընտրության եւ տարեկան քննության ցուցակի կազմման խնդիրներով: Ժամանակի եկեղեցական-ծխական դպրոցների կրթական համակարգի, դասավանդվող առարկաների մասին որոշակի պատկերացում կազմելու համար անդրադառնանք 1886 թ. եկեղեցական-ծխական դպրոցների ուսումնական ծրագրերին.

Կրոն

- Համառոտ պատմություն եկեղեցական գլխավոր տոների վերաբերյալ:
- Աղոթքների եւ սուրբ պատարագի սերտողություն:
- Եկեղեցական երգերի եւ շարականների սերտողություն:
- Հին ու Նոր կտակարանների պատմություն:
- Հայաստանյայց Առաքելական Սուրբ Եկեղեցու համառոտ պատմություն:

Հայոց լեզու

- Բանավոր եւ գրավոր վարժություններ:
- Ընթերցանություն:
- Աշխարհաբարի համառոտ քերականություն:
- Գրաբարի համառոտ քերականություն:

Ռուսաց լեզու


Մեջբերումը ներկայացնում ենք բառացի. *Ա բաժին*. «Ուսումն ռուսաց լեզուի սկսանի յերկրորդ կիսամէկէ առաջին տարւոյն՝ նուիրելով այնմ կէս ժամ յաւուրն: Կէտ նպատակի դասատութեան պարտի լինել ծառայ առնել խօսուն բարբառոյ Ռուսաց....»: *Բ բաժին*. «....զկնի բաւականապէս ընտելացուցանելոյ զլսելիս մանկանց յըմբռնումն անսովոր ծայնից եւ կապակցութեան նոցին.... մարթ է սկիզբն առնել ուսուցանելոյ աշակերտաց զընթերցանութիւն եւ զգրութիւն ռուս լեզուի....»:

Գ բաժին. «Ի վերջ կոյս տարւոյն ի հատուածոց ընթերցելոց պարտ է հանել կանոն քերականականս եւ մանաւանդ ուղղագրականս: Աշակերտք պարտին գիտել զլեզու ռուսաց այնչափ, որչափ ինչ մատակարարեալ են նոցա հատուածքն ընթերցելոյ յընթացս տարւոյն»: ➔ էջ 6

Անիրավ տնտեսի առակը

Սկիզբը՝ թիվ 6—8

Անիրավ տնտեսի առակի այլաբանական մեկնությունն ընդգծում է «խաբեբայական կատակերգության» եւ Աստծու արքայության միության անհամապատասխանությունը: Երկու անփոփ եզրակացությունները փորձում են իմաստ (հետեւողականություն) հաղորդել առակին՝ ուշադրությունը շեղելով պատուհան մերկայացվող մեծ կերպարից: Այլաբանությունների տարօրինակությունը, սակայն, միայն մատնանշում է առակի խոր եւ միաժամանակ անհանգստացնող ազդեցությունը: Տիրոջ գովասանքն իր ծառայի անազնիվ արարքի համար բախվում է արդարության պահանջին, որը սովորաբար ընկալվում է իբրեւ Աստծու արքայության խորհրդանիշ: Ինչպէս են դրանք փոխկապակցվում միմյանց:



Երբ տիրոջ գովասանքը եւ անիրավ տնտեսի վարքագիծը բախվում են այն արդարությանը, որ ենթադրելիորեն առակ է Աստծու արքայությունում, լսողը պետք է հասկանա, թե ինչ կարող է նշանակել «աստվածային արքայության արդարություն» ասվածը: Առակը չի առաջարկում «արքայության արդարության» մի նոր սահմանում կամ օրենք: Այն հուշում է, որ տույն արդարությունն ինչ-որ կերպ ուրվագծվում է այս առակում. քանի որ այս առակը ներկայացնում է մի այնպիսի իրավիճակ, որը վերաբերում է տնտեսությանը, ապա այս դեպքում աստվածային արքայությունը փոխաբերական իմաստով կարող ենք ընկալել իբրեւ տնտեսություն:

Հաշվարկի նպատակն արդարությունն է, եւ ակնկալվում է, որ տերը կմիջամտի եւ կվերականգնի մախապես հաստատված կարգը: Այսպիսով՝ այլաբանությունները

մեզ օգնում են հնարավորություն են ընձեռում ճիշտ վերարտադրելու առակի բովանդակային եւ իմաստային կառուցվածքը:

Տիրոջ գովասանքն ընթերցողին ստիպում է հետադարձ հայացք գցել եւ վերաայել առակում տեղ գտած բնութագրումները: Արդյո՞ք տիրոջ որոշումը կամայական էր: Ունեցվածքը վատնելու մեղադրանքը ճիշտ էր, թե՛ կեղծ: Առակն այս հարցերի պատասխանը չի տալիս, եւ այն տրամաբանությունը, որով ընթերցողն իմաստավորել է պատումն ու առաջնորդվել դրանով, փլուզվում է, երբ վերջին հատվածում հայտնվում են տիրոջ գովասանքի խոսքերը:

Առակը ներկայացնում է աշխարհի հակառակ կողմը՝ ի տարբերություն ընթերցողի պատկերացրած աշխարհի: Տերերի եւ ծառաների այդ աշխարհում իշխանությունն ու արդարությունն այլ են: Հարուստն ունի իշխանություն, եւ նրա նախնական դատողությունը՝ կամայական եւ անորոշ, կարող է իրագործվել մեկ պարզ պատճառով. նա հզոր է: Տնտեսը կարեկցանքով իր կողմն է գրավում ընթերցողին, իսկ տերը, ի վերջո, լսարանից պահանջում է խոստովանություն, որ տնտեսի արարքն անարդար է, եւ միաժամանակ կորցնում է իր իշխանությունը՝ գովելով իր անիրավ ծառային: Տիրոջ գովասանքն ընթերցողին ստիպում է վերաայել հարուստի կարծրատիպային կերպարը, որը գործում է առակում: Ի հայտ է գա-

լիս անորոշություն. մեծահարուստ տերերը դաժան են, թե՛ ոչ, քանի որ առակը խզում է իշխանության եւ արդարության միջեւ կապը: Ուստի ընթերցողն այսուհետեւ պետք է առաջնորդվի իշխանության եւ արդարության մոտ չափանիշներով:

Այսպիսով՝ դրն է առակի ուղերձը, կամ ինչ տրամաբանությամբ է առաջնորդվում տնտեսը՝ գովասանքի արժանանալով եւ մեզ համար օրինակելի կերպար դառնալով: Հավանաբար, ինչպես արդարացիորեն նկատում է Շերցոգը, դա ընդամենը հնարամտություն էր, որով տնտեսը հույս ուներ արժանանալու իրենից օգնություն ստացած առեւտրականների երախտագիտությանը: Արդյո՞ք խորագետ մեծահարուստները, որոնք աշխատում էին ոչ մեծ շահույթով, նման «բարերարություն» կանեին՝ օգնելով գործազուրկ տնտեսին (օրինակ՝ աշխատանքի վերցնելով նրան), հատկապես երբ շուտով պետք է հասկանային, որ իրենց հետ գործակցած տնտեսն աշխատանքից հեռացվել է չարաշահման համար:

Ամենայն հավանականությամբ լուծման բանալին հետեւյալն է. տնտեսը զգալի լիազորություններ է ունեցել: Նա մտածել է, որ պարտավճարի տոկոսադրույքների զրոյացումը դրականորեն կանդաղառնա իր տիրոջ հեղինակության եւ գործերի հետագա ընթացքի վրա. վաճառականները հողի սեփականատիրոջ հանդեպ պարտքի զգացում կունենան, եւ կալվածատերը կփառաբանվի իր առատաձեռնության համար (արժանիք, որից հողատերը չէր ցանկանա իրաժարվել): Արդյունքում կամ հողատերը կներեր տնտեսին, որն ապացուցել էր իր հմտությունը՝ վաճառականների հետ գործարքի մեջ մտնելով. կամ առնվազն նրա ծառայությունները կառաջարկեր ուրիշներին: Եվ «տները», որտեղ տնտեսը հույս ուներ ընդունելություն գտնել, պետք է դիտարկել ոչ թե որպես անվերջ հյուրընկալության վայրեր՝ անգործության դիմաց, այլ որպես հարուստների տներ, որտեղ նա կարող է ստանալ առավել նպաստավոր աշխատանք:

Տնտեսի ծրագիրը կարծես հաջողվեց. նա դրվատանքի է արժանանում իր տիրո-

ջից «հնարամտության» համար: Տերն իր տնտեսի գործողություններում նկատում է եւ իրեն, եւ իր հաճախորդներին օգուտ բերելու հնարամտությունը: Տնտեսը հեղինակություն է բերում իր տիրոջը եւ, որ իր համար առավել կարեւոր է, ցույց է տալիս իր գործատուին օգտակար լինելու կարողությունը: Եվ չնայած կալվածատերը խաբվել է իր ծառայից, սակայն նրան հիացնում է վերջինիս հնարամտությունը:

Առակն անուղղակիորեն գովաբանում է հնարամտի տնտեսին: Լինելով բարդ կացության մեջ՝ տնտեսը ճգնաժամից էլք է գտնում «արդարության» գործադրմամբ, ինչն օգուտ է բերում ոչ հարուստ վաճառականներին. տոկոսադրույքների անօրինական չեղարկումը, որ իր տիրոջ նկատմամբ այնքան էլ «անհավատարմություն» չէ, իրականում, պարզվում է, հավատարմություն է Աստծու հանդեպ:

Այս առակն ընթերցողներից շատերը որեւէ կերպ չեն կարողանում տնտեսի մեջ օրինակելիություն տեսնել սոսկ այն պատճառով, որ, չնայած հնարամտությանը, նա ակնհայտորեն խորամանկ է: Բայց որոշ առակների այլ կերպարներ եւս միաժամանակ ներկայացվում են որպես շահախնդիր. օրինակ՝ անառակ որդին՝ վերադառնալու իր որոշմամբ (տես Ղուկ. ԺԵ 18—19), դատավորը՝ ճնշման ազդեցությամբ ընդունած իր վճռով (տես Ղուկ. ԺԸ 4—5), մաքսավորն իր խնդրանքով (տես Ղուկ. ԺԸ 13):

Քրիստոնեական վարդապետությունն ընդհանուր առմամբ ենթադրում է արդարության եւ անձնական շահի համատեղում, ինչպես արտացոլված է նաեւ Իսրայելի Իմաստության ավանդույթում: Այսպիսով՝ պետք չէ հեզմալից դատողություններ անել ըստ Ղուկ. ԺԶ 8-րդ համարի խոսքերի («.... այս աշխարհի որդիներն իրենց սերնդի մեջ ավելի հնարամիտ են, քան լույսի որդիները....») կամ Ղուկ. ԺԶ 9-րդ համարի հորդորի («....նույնիսկ անիրավ մամոնայից ձեզ համար բարեկամներ չհենք....»):

Շարունակելի

ԱՃՆԱ ՀՈՎՍԵՓՅԱՆ

Գերմաներենից ընտրողաբար քարգմանել ենք ֆրանսիացի հեղինակ Frere John Taize-ի «Աղբյուրի մոտ. Հիսուս եւ սամարացի կինը» (An der Quelle. Jesus und die Samariterin) գրքից մի փոքր հատված, որը վերաբերում է Աստվածաշունչ մատուցող հիշատակվող ջրի աղբյուրներին եւ ներկայացնում է դրանց նշանակությունը:

Ուրը մարդկային գոյության պահպանման ամենակարեւոր արարքներից մեկն է օրից հետո, որ շնչում ենք: Առանց ջրի կյանք գոյություն չունի: Սակայն այսօր մեր շրջապատում ջուր ունենալու համար բավական է միայն ծորակը բացել. այն ինքնին վերածվել է սովորական երեւոյթի: Բայց բոլոր վայրերում ամենեւին էլ այդպես չէ. ջուրն ինքնաբերաբար չի գալիս, պետք է փնտրել: Եթե բախտը ժպտում է, մարդիկ ջուր են գտնում երկրի մակերեսային՝ գետերում, լճերում կամ աղբյուրներում: Սակայն առավել չորային վայրերում եւ անապատային շրջաններում, ինչպես օրինակ՝ Պաղեստինում, այնքան էլ դյուրին չէ ջուր գտնելը: Ամիրաթեշտ է խոր փոս փորել՝ ստորգետնյա աղբյուր գտնելու համար, որի վրա եւ կարելի է ջրիոր կառուցել: Այսպիսով պարզ է դառնում, թե ինչու են ջրիորներն այդքան կարեւոր վայրեր եղել սուրբգրային աշխարհում: Դրանք կենսատու աղբյուրներ են՝ բառիս բուն իմաստով, շրջադարձային եւ առանցքային վայրեր, որոնք առհասարակ հնարավոր են դարձրել մարդկային կյանքը, քանի որ ջրիորի մոտ կարող էր առաջանալ եւ զարգանալ մարդկային համակեցությունը: Ջրիորի մոտ էին ժո-

ղովվում մարդիկ, եւ հազվադեպ չէին նաեւ ջրիորի շուրջ տեղի ունեցող վեճերը: Ծննդոց գրքի ԻԶ գլխում կարդում ենք, որ Իսահակ նահապետը սովի պատճառով գնում է փղշտացիների արքա Աբիմելեքի մոտ՝ Գերարա: Այստեղ նա գարի է ցանում եւ նույն տարում էլ հայրուրապատիկ բերք ստանում: Աստված օրինում է [Իսահակին], եւ նա հարստանում է այն աստիճան, որ մեծահարուստ է դառնում (հմմտ. Ծննդ. ԻԶ 1—14): Սակայն «....փղշտացիները մախանձում են նրան եւ խցանում այն բոլոր ջրիորները, որ նրա հոր՝ Աբրահամի օրոք փորել էին նրա ծառաները. փղշտացիները դրանք լցնում են հողով» (հմմտ. Ծննդ. ԻԶ 15—16): Այնուհետեւ Աբիմելեք արքան ասում է Իսահակին. «Դեռացիր մեր մոտից, որովհետեւ մեզնից շատ ավելի զորավոր եղար» (Ծննդ. ԻԶ 16): Իսահակն այդտեղից գնում եւ վրան է խփում գերարացիների ձորում: Իսահակը դարձյալ փորում է այն ջրիորները, որ փորել էին իր հոր՝ Աբրահամի ծառաները: Այնուհետեւ Իսահակի ծառաները հող են փորում գերարացիների ձորում եւ այնտեղ գտնում են ընկալի ջրի աղբյուր: Գերարացիների հովիվները Իսահակի հովիվների հետ կառուցում են ջրիոր, ինչը վերջում հանգեցնում է եւս մեկ վեճի: Վերջիններս, մասնակցելով ջրիորի կառուցմանը, ասում են թե՛ «....իրենցն է այդ ջրիորը» (հմմտ. Ծննդ. ԻԶ 20): Եվ քանի որ ջրիորի կառուցումը վեճի առիթ է դառնում, այս ջրիորն անվանում են *Ամիրա-*



վություն: Իսահակ նահապետը եւս մեկ ջրիոր է փորում, ինչը նույնպես վեճի առիթ է դառնում. այս անգամ ջրիորը կոչվում է *Թշմամություն:* Դարձյալ ջրիոր է փորում. այս անգամ վեճ չի ծագում, եւ ջրիորն անվանում է *Ամորորություն*՝ ասելով. «Այժմ մեզ ընդարձակ տեղ տվեց Տերը եւ բազմացրեց մեզ երկրի վրա» (Ծննդ. ԻԶ 22):

Ջրիորները հաճախ ընդհարումների, սակայն երբեմն նաեւ հաշտության վայրեր են եղել: Դրանց շուրջը, կարծես, ձեւավորվել է մարդկային հասարակությունը: Ծննդոց գրքի ԻԴ գլխում խոսվում է Աբրահամի՝ իր որդի Իսահակի համար կին գտնելու ցանկության մասին: Այդ նպատակով նա իր ծեր եւ հավատարիմ ծառային ուղարկում է Քանանից հեռու՝ իր հայրենիք, որտեղ ինքն էր ծնվել: Երբ

ծառան հանգիստ էր առնում ջրիորի մոտ, այսպես է աղոթում. «Իմ տեր Աբրահամի Տեր Աստված, այսօր ինձ հաջողություն պարգևիր եւ ողորմիր իմ տեր Աբրահամին: Ահա ես ջրի աղբյուրի մոտ եմ, եւ այս քաղաքի բնակիչների դուստրերը գալիս են ջուր հանելու: Թող լինի մի կույս, որից ասեմ՝ «Թեքիր սափորդ, որ խմեմ», իսկ նա ինձ պատասխանի՝ «Խմիր, քո ուղտերին էլ ջուր կտամ, մինչեւ որ հագնեման խմելուց»: Թող նրան էլ մախատեսած լինես քո ծառա Իսահակի համար....» (Ծննդ. ԻԴ 12—14): Կարճ ժամանակ անց Ռեբեկա անունով մի աղջիկ է գալիս ջրիորի մոտ՝ կուժը ձեռքին՝ ջուր հանելու: Ծառան նրանից մի քիչ ջուր է խնդրում, եւ ամեն բան պատահում է այնպես, ինչպես աղոթքով խնդրել էր: Աղջիկը ծա-

Աղբյուրն

ռային հրավիրում է իրենց տանը գիշերելու, եւ ի զարմանա ծառայի՝ պարզվում է, որ նա Աբրահամի ազգակիցն է: Երկար բանակցություններից հետո Ռեբեկան համաձայնում է ծերունու հետ զնալ՝ Իսահակի կինը դառնալու:

Հիմկտակարանյան հաջորդ պատմությունը, որին ցանկանում ենք անդրադառնալ, վերաբերում է Հակոբ նահապետին (տես Ծննդ. ԻԹ 1—30): Հակոբը ճանապարհ էր ընկել հայրենիքից հեռու եւ հանգստանում էր մի ջրիորի մոտ, որի բերանին մի մեծ քար էր դրված: Մի քանի հովիվ եւս այդտեղ էին եւ սպասում էին՝ մինչեւ բոլոր հոտերը ժողովվեն, եւ միայն դրանից հետո էին ցանկանում քարը մի կողմ գլորել, որպեսզի կենդանիներին ջրեին: Գրվածքից պարզ չէ՝ ինչու էին հովիվներն իրար սպասում. արդյո՞ք քարն էր ծանր, ջրիորը ծածկված էր, որովհետեւ քիչ ջուր կար այդտեղ, կամ հովիվներն սպասում էին կենդանիներին ջուր տալուն՝ խուսափելով առավել ուշ եկողների հետ տարաձայնություններից: Եվ այդ ժամանակ մի երիտասարդ աղջիկ, ոչխարների հոտն առած, գալիս է ջրիորի մոտ: Նա Հակոբի մորեղբայր Լաբանի դուստր Ռաբելն էր: Հակոբը մի կողմ է գլորում քարը եւ ջրում մորեղբոր հոտը, ապա Ռաբելի հետ ուղեւորվում է Լաբանի տուն եւ այնտեղ իջեւանում: Հակոբը ցանկանում է կնույթյան առնել Ռաբելին, սակայն պետք է յոթ տարի սպասեր. նա, այնուամենայնիվ, քսան տարի ծառայության մնաց Լաբանի մոտ:



Խաղավանք

Սկիզբը՝ թիվ 12

Խաղավանքի վերակառուցմանն ու լրացուցիչ նորոգումներին ժԳ դարավերջին եւ ժԴ դարասկզբին մասնակից են եղել նաեւ Հասան Բ-ի որդի Գրիգորն ու նրա կին Ասփան:

Միջնադարյան Հայաստանում՝ հատկապես ժԲ դարավերջին եւ ժԳ դարասկզբին արհավիրքներից կամ թշնամի հրոսակներից կործանված վանքերում մնացած որոշ մասունքներ պահպանվել են հին տեղը կառուցված եկեղեցիներում, ինչպես որ քրիստոնեության արշալույսին բազմաթիվ վանքեր ու եկեղեցիներ խոյացել են հեթանոսական մեհյանների ու տաճարների հիմքերից: Հին բեկորներին նոր կյանք շնորհելու երևույթն իր փայլուն դրսևորումն է ունեցել ինչպես Դադիվանքում, այնպես էլ Խաղավանքում:

1180-ական թվականներին Դադիվանքում

քում Հասան Կրոնավորյալը կառուցում է մի փոքրիկ եկեղեցի, որի պատերի մեջ՝ ներսից ու դրսից, ագուցվում են հին քարեր՝ զարդաքանդակներով ու վիմագրերով, հին ու նոր խաչքարեր, որոնք թվագրվում են Դ-Ձ դարերով:

Ուշագրավ է հատկապես ջրաղացքարը, որ զարդարում է Դադիվանքը: Եկեղեցու շինարարները փրկել-պահպանել են կործանված ջրաղացի բեկորը:

ԺԲ դարի առաջին կեսին ավերված Խաղավանքում էլ Հովհաննես վրդ. Խաչենցին կառուցում է եկեղեցի, որի պատերի մեջ՝ դարձյալ ներսից ու դրսից, նույնպես առկա են արձանագրությունների բեկորներ եւ հին խաչքարեր:

Հովհաննես Խաչենցու կառուցած տաճարի խորհրդավոր նշաններից մեկը կարելի է համարել կտուրն իրենց վրա կրող չորս սյուների հարդարանքը: Դրանց մույթերին կենդանական, թռչնային եւ մարդկային

գլուխներ են քանդակված՝ մեկական քանդակ յուրաքանչյուր սյան ճակատին, որ հայ միջնադարյան ճարտարապետության մեջ բավականին տարածված երևույթ է: Խաղավանքի գլխավոր եկեղեցու ներսի չորս սյունների մույթերին քանդակված մարդու, առյուծի, ցլի եւ արծվի պատկերներն ակնարկում են քառակերպ՝ չորս Ավետարանները:

Խաղավանքի բոլոր եկեղեցիներն ու օժանդակ շինությունները կառուցված են կոպիտ մշակված բազալտ քարերից՝ ամրացված կրաշաղախով: Միայն եկեղեցու սյուները, կամարները եւ մուտքի բարավորն է սրբատաշ բազալտից: Գլխավոր եկեղեցու կողքին կառուցվել է երկու մատուռ՝ ընծայված Սուրբ Պրոկոպիոսին եւ Սուրբ Մինասին: Խաղավանքի մատուռները հար եւ նման են Արցախ աշխարհի մյուս նշանավոր վանքերում առկա գլխավոր եկեղեցիներին կից մատուռներին՝ Դադիվանքի, Գոշավանքի, Հռեկավանքի, Եղիշե առաքյալի վանքերի մատուռներին:

Խաղավանքի գլխավոր տարբերակիչ հատկանիշներից կարելի է համարել այն բազմաթիվ խաչքարերը, որոնք տեղադրված են շարվածքի մեջ: Իսկ վանական համալիրի գլխավոր եկեղեցուն կից՝ հյուսիսային ճակատի արեւմտյան կողմում, վանքի զանգակատունն է, որը Վահրամ իշխանի որդի Սարգիս եպիսկոպոսը կառուցել է ԺԴ դարի առաջին քառորդում (1333 թ.): Նա է կառուցել նաեւ Դադիվանքի, Գետամեջի եւ Ծար գյուղաքաղաքի եկեղեցիների զանգակատները:

Միջնադարյան Հայաստանում ժԳ-ԺԴ դարերում եկեղեցիների զանգակատները չունեին պարտադիր կաղապարված ճարտարապետական հորինվածք: Այս իսկ պատճառով ամեն մի վանքում լուծումները տարբեր էին լինում եւ յուրօրինակ: Եզակի է նաեւ Խաղավանքի զանգակատան տեղադրությունը, որն այստեղ հյուսիսային դիրք ունի:

Հատկանշական է, որ Խաղավանքի վանական համալիրը, ինչպես փաստում են ձեռագիր որոշ մատյաններ, միջնադարյան Հայաստանի հնագույն մատենադարաններ-

րից է եւ կամ երկրորդը, որ հիմնվել է հայոց գրերի ստեղծումից անմիջապես հետո:

Խաղավանքն իր ճարտարապետա-հորինվածքային նկարագրով համապատասխան է եւ գրչության կենտրոնի, եւ մատենադարանի: Մեծ երդիկով պսակվող առաջին սրահը մախատեսված է եղել իրեն ձեռագրատուն, իսկ խոշոր որմնախորշերով հաջորդ դահլիճը ծառայել է որպես մատենադարան-գրապահոց: Այսպիսի կառուցվածք ունեն նաեւ միջնադարյան Հայաստանի՝ մեզ հայտնի մյուս գրատուն-գրչության կենտրոնները՝ Հաղպատ, Սանահին, Գոշավանք, Սաղմոսավանք, Հռոմոս, Դադիվանք:

Գրիգոր իշխանի կինը՝ Ասփան, որ մեծ իշխան Տարսայիճի եւ Մինա Խաթունի դուստրն էր, Թարթառ գետի վրա կառուցում է մի կամուրջ՝ Խաղավանք տանող ճանապարհին, եւ խաչքար կանգնեցնում՝ կամրջի շինարարական արձանագրությամբ: Խաղավանքն Արցախի դպրոցի եզակի ու ինքնատիպ ճարտարապետական հորինվածքով առանձնահատուկ շինություն է, որտեղ գտնվում է հայկական խաչքարերի արժեքավոր մի հավաքածու՝ մեծագույն մասը վիմական արձանագրություններով:

Խաղավանքից արեւմուտք՝ ժայռի մեջ, գտնվում է Խաթառ բերդը:

Հայոց Արցախ աշխարհում հպարտ հառնող Խաղավանքը մշակույթի եւ ամանց արժեքների ստեղծման ու պահպանման կարեւորագույն մի կենտրոն է, որն իր անառիկ դիրքի ու ազգային իշխանների շնորհիվ ժամանակին դարձավ Հայաստանի տարբեր անկյուններում ստեղծված բազմաթիվ մեծարժեք ձեռագրերի պահպանման ու փրկության վայր, հոգեւոր լուսավորության օրրան: Եվ աստվածային լուսի ուժն ու զորությունը, որ միշտ առկա են եղել ու են ինչպես այս, նույն կերպ եւ հայոց բոլոր մյուս վանքերում, կճառագեն առիաւելտ՝ ի սեր եւ ի փառս Տոհմին Հայկազյան:

Հասնիկ ՄԱՐՈՅԱՆ

Աստվածաշնչում

Ըստ որոշ ավանդությունների՝ երբ Հակոբը քարը մի կողմ է գլուրում, պետք է որ ջուրը հանկարծ դուրս բխեր եւ վերածվեր մեծ ցայտաղբյուրի, այնպես որ այդ օրվանից սկսած բոլորի համար բավարար ջուր լիներ: Այս հատվածը նաեւ պարզաբանում է Լաբանի «խարդախ» վարմունքը Հակոբի նկատմամբ. յոթ տարի անց նա Հակոբին կնության է տալիս նախ իր [ավագ] դուստր Լիային եւ ոչ թե խոստացված Ռաբելին: Լաբանը, ըստ էության, վախճանում էր, որ ջրի մակարդակը կրկին կիջնի, եւ եթե Հակոբը հեռանա, միայն մեծ ջանքեր գործադրելով՝ դարձյալ հնարավոր կլինի ջուր հանել մարդկանց ու կենդանիների համար: Այդ իսկ պատճառով նա փորձում է Հակոբին իրեն եւ իր տանը մերձ պահել:

Ջրհորի մոտ հանդիպման հաջորդ պատմությունը վերաբերում է Մովսես մարգարեին (տես Ելք Բ 15-22): Արդարությունը վերականգնելու իր անհաջող փորձից հետո նա ստիպված էր փախչել Եգիպտոսից եւ բնակվել Մադիամի երկրում: Այստեղ՝ մի ջրհորի մոտ, նա հանգստանում էր: Երիտասարդ կանանց մի խումբ՝ այս անգամ յոթ թույր, ցանկանում էին ջրել իրենց հոտը, եւ հովիվները նրանց վախեցնում եւ քշում էին: Մովսեսը պաշտպանում է նրանց եւ ջրում ոչխարներին: Դրան ի պատասխան նրանց հայրը Մովսեսին առաջարկում է մնալ իր տանը: Արդյունքում Մովսեսը կնության է առնում թույրերից մեկին:

Ավանդության համաձայն՝ Մովս-

եսը կրկնում է Հակոբի կատարած հրաշքը եւ ջուր բխեցնում՝ իր ապագա աներոջն ապացուցելու համար, որ ինքը Հակոբի ժառանգն է: Հրեա պատմագիր Հովսեփոս Փլավիոսն այս պատմության սկիզբը շարադրում է հետեւյալ կերպ. «Երբ Մովսեսը մոտեցավ Մադիամ քաղաքին, նստեց մի ջրհորի մոտ ու հանգստանում էր իր հոգնեցուցիչ ճանապարհորդությունից եւ այն ծանր իրավիճակից, որում գտնվում էր: Նա քաղաքից հեռու չէր, եւ կեսօր էր» (Jüdische Altertümer II 11,1):

Աղբյուրի մոտ հանդիպումների հինկտակարանյան պատմությունների կողքին, որոնք ամուսնությանը են ավարտվում, կարելու են նաեւ աստվածաշնչյան մյուս հատվածները, որտեղ խոսքը հենց ջրի մասին է: Ջրի վերաբերյալ թեման մեծ նշանակություն ուներ հրեաների՝ Եգիպտոսից Ելքի ժամանակաշրջանում: Մովսեսի առաջնորդությամբ Եգիպտոսից դուրս գալուց հետո Իսրայելի որդիներն ստիպված էին անապատը կտրել անցնել մինչեւ կհասնեին Ավետյաց երկիր: Անապատում, սակայն, [նրանք] ջրի սաստիկ պահանջ են զգում, ինչը մեծ դժգոհության առիթ է դառնում: Հենց անապատում, որտեղ ջուր չկա, Աստված կարող է բխեցնել այնպիսի կենսատու աղբյուր, որն անսպասելիորեն կհագեցնի ժողովրդին. «Մովսեսը, պաղատագին խնդրելով Տիրոջը, ասաց. «Ինչ անեմ ես այս ժողովրդին: Մի քիչ էլ մնա՝ ինձ կքարկոծեն»: Տերն ասաց Մովսեսին. «Գնա ժողովրդի առջեւից, քեզ

հետ վերցրո՛ւ ժողովրդի ծերերին, ձեռքդ ա՛ռ քո այն գավազանը, որով հարվածեցիր գետին, եւ, ճամփա ընկիր: Ես քեզից առաջ այնտեղ հասնելով, կկանգնեմ Քորեբի ժայռի վրա: Կհարվածես ժայռին, դրանից ջուր կբխի, եւ քո ժողովուրդը կխմի» (Ելք ԺԷ 4-6):

Թվոց գրքում եւս ջրհորի մասին վկայություն կա փոքր-ինչ առեղծվածային շարակարգում, որը հետագա ավանդության համար կարելու նշանակություն ձեռք բերեց: Այնտեղ ասվում է. «Դրանից այն կողմ ջրհորն էր: Դա այն ջրհորն է, որի մասին Տերն ասաց Մովսեսին. «Հավաքիր ժողովրդին, որ ես նրանց խմելու ջուր տամ»: Այն ժամանակ իսրայելացիները ջրհորի մոտ այս երգը երգեցին. «Փառաբանեցե՛ք այն ջրհորը, որ փորեցին իշխանները, այն խորացրին հղկեցին ազգերի թագավորները իրենց թագավորության եւ տիրապետության ժամանակ» (Թվեր ԻԲ 16-18):

Այստեղ խոսքն անապատում գտնվող մի աղբյուրի, այդ աղբյուրին միլրված օրհներգի եւ մի շարք այլ վայրերի մասին է, որոնցով պետք է հրեա ժողովուրդն անցներ: Առաջին հայացքից վերը թվարկվածը կարծես անիմաստ է: Ռաբբիները սույն օրհներգը մեկնում են այսպես: Ջուրը, որ Աստված անապատում տվեց ժողովրդին, իրականում հարյուրավոր տարիներ առաջ նախահայրեր Աբրահամի, Իսահակի եւ Հակոբի փորած ջրհորն էր: Այս զարմանահրաշ աղբյուրը Իսրայելի ժողովրդին ուղեկցում էր ամայի վայրերում դեգերումների ընթացքում: Համա-



ձայն այս մեկնության՝ կար միայն մեկ ջրհոր՝ մի զարմանահրաշ աղբյուր, որն Աստված ուղարկեց Իր ժողովրդին ուխտի ճանապարհին: Այս անապատում հղում անելով՝ որոշ ռաբբիներ շարունակում են առաջարկված ուղղությունը: Նրանք եզրակացնում են, որ այս պարագայում չէր կարող նկատի առնվել սովորական ջուր բխեցնող ջրհոր: Նրանք այլաբանական մեկնությամբ հանգում են այն մտքին, որ ջրհորը Թորան է՝ Օրենքը, ինչն Աստված Մինա լեռան վրա Մովսեսի միջոցով փոխանցեց Իր ժողովրդին: Այն կյանքի աղբյուրն էր, որը պատմության ողջ ընթացքում, նույնիսկ խոտոր ուղիներում, ուղեկցեց [Իսրայելի] ժողովրդին: Թորան փոխանցելու միջոցով ժողովուրդը հաղորդակից դարձավ աստվածային խոսքին եւ իմաստությանը: Ընդ որում՝ պետք է նկատել, որ նյութական իրականության «հոգեւոր» մեկնությունն առաջին անգամ Հիսուս Քրիստոսի Ավետարանով չի սկսվում. հրեական ավանդությանը նույնպես այն արդեն



հայտնի էր: Պողոս առաքյալը՝ որպես փարիսեցիական կրթություն ստացած հրեա, մեծացել էր այս ավանդության [միջավայրում] եւ ազդվել դրանից: Կորնթոսի հավաստյալներից բացատրելու համար, որ նրանց նախնիները որոշակիորեն նույնպես մկրտություն կամ նույնիսկ հաղորդություն են ստացել, առաջարկում է անապատում իսրայելացիների փորձառության վերաբերյալ հետեւյալ պատկերավոր միտքը. «Եղբայրներ, չեմ ուզում, որ անգիտանաք, որ մեր հայրերը բոլորն էլ ամպի առաջնորդության տակ էին, եւ բոլորն էլ ծովով անցան. եւ բոլորը, հետեւելով Մովսեսին, մկրտվեցին ամպ ու ծովի մեջ. եւ բոլորն էլ նույն հոգեւոր ուտելիքը կերան, եւ բոլորն էլ նույն հոգեւոր ըմպելիքը խմեցին, որովհետեւ խմում էին հոգեւոր այն վեմից, որ գնում էր նրանց հետ, եւ այն վեմը Ինքը՝ Քրիստոս էր» (Ա Կորնթ. Ժ 1-4):

Գերմաներենից
թարգմանությունը՝
Մարիան ՀԱՐՈՒԹՅՈՒՆՅԱՆԻ

ՅԱԿՈԲ ՊԱՏՐԻԱՐԺ ՆԱԼԵԱՆ ՔՐԻՍՏՈՆԷԱԿԱՆ ՈՒՍԱՆԵԼԻ

Սկիզբը՝ թիւ 9—12

Հաւատքի աստիճաններուն մեկնութիւնը

Ե

Հինգերորդ աստիճանն այս էր. *դժոխք իջաւ*, որ Սուրբ Թովմաս առաքեալն ըսաւ։

Այս խօսքով յայտնի ու յստակ կը դառնայ Քրիստոսի սէրը մեռելներուն հանդէպ, որոնց հոգիները Ադամի մեղքին պատճառով դժոխքի մէջն էին։ Արդ, ինչպէս Աստուած արեգակը կծագեցնէ չարերուն ու բարիներուն վրայ, անձրեւ կու տայ արդարներուն ու մեղաւորներուն, եւ ինչպէս հրամայեց բարիք ընել մեզ ատողներուն ու օրհնել մեզ անիծողները. տակաւին, ինչպէս խաչին վրայ գիւնք խաչ հանողներուն համար աղօթեց, թէ՛ «Հայր մեր՛ ասոնց, որովհետեւ չեն գիտեր, թէ ինչ կ'ընեն»։ Նոյնն ըրաւ դժոխքին մէջ՝ այցելելով արդարներուն ու մեղաւորներուն՝ ըսելով, թէ՛ դուք, որ կապանքներու մէջ էք, ելէք, եւ որ խաւարի մէջ էք, յայտնուեցէք, որովհետեւ ես Իմ Նոր Ուխտի արիւնովս կ'արծակեմ ձեզ՝ տառապանքներու անջրդի գութին մէջ կապուածներդ՝ ըստ Ջաքարիա մարգարէի վկայութեան։ Սակայն Քրիստոս արդարներուն յաւիտենական փրկութիւն ըրաւ, իսկ մեղաւորներուն՝ ժամանակաւոր փրկութիւն, որովհետեւ դատաստանի օրն անոնք դարձեալ դժոխք պիտի դառնան, ինչպէս Դաւիթն ըսաւ, թէ՛ մեղաւորներն այնտեղէն դժիքն պիտի դառնան։

Սուրբ Թովմասը եղեմզմաբար (թանկագին քարի տեսակ մը), զինկի գոյն կամարածեւ,

Ներքեւ իջած Փրկիչը, մեզի փրկութիւն ըրաւ, կ'ըսէ։

2

Վեցերորդ աստիճանն այս էր. *երրորդ օրը մեռելներէն յարութիւն առաւ*, որ Սուրբ Բարդուղիմէոս առաքեալն ըսաւ։

Այս խօսքով Քրիստոսի անյաղթելի զօրութիւնը կը յայտնուի, որ միայնակ դժոխք իջաւ ու բազմաթիւ աւարով ու թալանով ելաւ։ Դարձեալ՝ Քրիստոսի զօրութիւնը յայտնի կ'ըլլայ հոգիին ու մարմինին միաւորութենէն, որովհետեւ երկու բան, որ պատճառով մը իրարմէ կը բաժնուին, այդ պատճառին վերանալէն ետք անհրաժեշտ է, որ կրկին զան ու մէկտեղ միաւորուին։ Տակաւին՝ Քրիստոս Աստուած մեր փրկութեան համար խաչին վրայ մարմինով մեռաւ, եւ ինչպէս որ մարմինով փրկութիւն, լուսաւորութիւն եւ առողջութիւն ըրաւ երկրի վրայ բոլոր տկարներուն, այդպէս ալ բնական հոգիով պէտք էր, որ բանական հոգիներուն ճար մը գտնէր դժոխքին մէջ։ Եւ ինչպէս որ մարմինով մարմնաւորներուն քարոզեց, այդպէս ալ հոգիով՝ դժոխքին մէջ եղած հոգիներուն, որպէսզի Աստուած ըլլայ ամէն ինչի ու ամէնուն՝ ըստ Պօղոսի վկայութեան։

Տակաւին՝ քանի որ գործն աւարտեցաւ, ու հոգիին բաժանումին պատճառը վերացաւ մարմինէն, վայելուչ էր, որ այդ հոգին ու մարմինը դարձեալ գային ու միաւորուէին. այս մէկն անկասկած պատահեցաւ Իր թաղումէն երեք օր ետք։

Իսկ թէ ինչո՞ւ համար շուտով յարութիւն չառաւ, այլ երեք օր ետք, այս ալ առանց պատճառի չէ։

Նախ՝ որպէսզի մարգարէներուն խօսքը կատարուէր, որոնք այնպէս զուշակած էին, թէ՛ երեք օր գերեզմանին մէջ պիտի մնայ, ինչպէս Յովնանը կէտ ձուկի փորին մէջ մնաց։

Երկրորդ՝ որպէսզի Քրիստոսի մահը փաստուէր, որպէսզի չըսէին, թէ աչքերուն երեցող էր, այդ պատճառով շուտով յարութիւն առաւ։

Երրորդ՝ որպէսզի Քրիստոսի մարմինին անապականութիւնը փաստուէր, որովհետեւ Անոր մարմինը երեք օր գերեզմանին մէջ պիտի մնար, որով չէր կրնար հոտիլ, ինչպէս Ղազարոսին մարմինը, որպէսզի Դաւիթին խօսքը կատարուէր, թէ՛ սուրբիդ թոյլ պիտի չտաս, որ ապականութիւն տեսնէ։

Չորրորդ՝ Քրիստոս մեզի օրինակ տուաւ, թէ ինչպէս ես երեք օր ետք յարութիւն առի, այդպէս ալ բոլոր քրիստոնեաները մեղքերու դժոխքէն յարութիւն կ'առնեն զոջալէ, խոստովանելէ ու ապաշխարելէ ետք։

Դարձեալ՝ Քրիստոս երեքօրեայ թաղմամբ ու յարութեամբ մեզի ցոյց տուաւ, թէ մարդը մեղքով երեք կերպով կը մեռնի։ Որովհետեւ ոմանք միշտ անմահ են Աստուծոյ շնորհիւ, ինչպէս հրեշտակները. ոմանք կան, որոնք կը մեռնին, կ'ողջնան ու դարձեալ կը մեռնին, ինչպէս Ղազարոսը, որ կը մշանակէ՝ մեղաւորը, որ մեղքերու մահէն կը դառնայ, ու դարձեալ մեղքերու մէջ կ'իյնայ ու կը մեռնի, որ եթէ դարձեալ կամենայ դառնալ, դժուարութեամբ կը կանգնի։ Ինչպէս Քրիստոս Ղազարոսին արցունքներով, մեծ աղաղակով ու աղօթքով յարութիւն տուաւ, որովհետեւ չորսօրեայ էր։ Չորսօրեայ ըսելով՝ կ'իմանանք մեղքերու հաւանութիւնը, գործը, սովորութիւնը եւ մեղքերուն մէջ յամառիլը։

Երկրորդն անոնք են, որոնք կը մեռնին ու յարութիւն չեն առներ. այդպիսիները չզոջացող մեղաւորներն ու դէւերն են, որոնք յաւիտեան չեն ողջնալ։

Երրորդն անոնք են, որոնք մէկ անգամ մեռան ու յարութիւն առին եւ այլեւս չեն մեռնիր, ինչպէս էր պարագան Քրիստոսի յարութեան, Տիրամայր Աստուածածինինը, Յովհաննէս աւետարանիչինը եւ այն սուրբերուն, որոնք մեռելներէն յարութիւն առին, երբ Քրիստոս Իր հոգին աւանդեց։ Ասոնք կը խորհրդանշեն մէկ անգամ մեղանշողը, ապաշխարութեամբ կանգնողը եւ այլեւս չմեղանշողը։

Բարդուղիմէոս այն սարդիոնը, անմարելին ինչպէս սէլան,

Տիրոջ յարութեան երրորդ օրը, վկայ կ'ըլլայ աստուածաբան։

Ե

Եօթներորդ աստիճանն այս էր. *երկինք ելաւ ու ամենակարող Հօր աջ կողմը մտաւ*. այս մէկը Փիլիպպոս առաքեալն ըսաւ։ Ասով մեզի սուրբերուն կատարեալ երանութիւնը կը սովորեցնէ։

Նախ՝ թէ մարդ պէտք է աշխարհէն ու աշխարհի սէրէն ելլէ, թեթեւայ մեղքերէն, որպէսզի կարենայ երկինք վերանալ. ինչպէս եմովքը, որ Աստուծոյ հաճելի եղաւ, եւ Աստուած գայն Ադամին դրախտը փոխադրեց։

Երկրորդ՝ սուրբերուն վայելուչ տեղը կը սովորեցնէ, որ կ'ըսէ՝ երկինքի մէջ։

Երրորդ՝ սուրբերուն՝ աշխատանքէ հանգստութիւնը, այդ պատճառով կ'ըսէ՝ մատաւ։

Չորրորդ՝ գեղեցիկ ընկերակցութիւնը, որ կ'ըսէ՝ Հօր աջ կողմը։

Հինգերորդ՝ սուրբերուն անկողողպտելի փառքը, ուստի կ'ըսէ՝ ամենակարող, որովհետեւ Քրիստոս ըսաւ, թէ՛ հաւատացեալներն ու ոչխարները, որ Հայրն Ինծի տուաւ, ո՛չ ոք կրնայ յափշտակել Հօրս ձեռքէն, քանի որ արդարներուն հոգիներն Աստուծոյ ձեռքերուն մէջն են, ու մահը չի կրնար անոնց մօտենալ, ինչպէս կ'ըսէ Սողոմոն Իմաստունը։

Արդարեւ՝ Քրիստոս համբարձաւ, Աստուածածինը վերափոխուեցաւ, Եղիան ու եմովքը վերացան, սուրբերը կը թռչին, որովհետեւ թեթեւ ամպերու նման են։

Տակաւին՝ Սուրբ Աստուածածինն իր Որդիով վերափոխուեցաւ. Եղիան՝ հրեշտակներով. սուրբերը՝ երկու թևերով՝ հաւատքով ու բարի գործերով, իսկ Քրիստոս առանց օգնականի ու աջակցողի համբարձաւ եւ մտաւ ու միշտ կը մտնի Հօր աջ կողմը, այսինքն՝ Իր Հօր յաւիտենական փառքին մէջ։

Աջ կողմով կ'իմանանք, թէ Անորմէ երբեք չբաժնուեցաւ։

Սուրբ Փիլիպպոսը՝ ոսկեքար թիւայ (անորոշ տեսակի թանկագին քար),

Մեր Փրկիչի համբարձումին վկայ է, Թէ՛ փառքի մէջ՝ Իր Հօր մօտ մնայուն կերպով մտաւ, Որմէ յաւիտեան բաժանուն չկայ։

Շարունակելի

**Փոխադրութիւնը՝
Վարանդ (Յակոբ) ԶՈՐԹՍՈՍԵԱՆԻ**

Հայ եկեղեցին եւ արեւելահայ դպրոցը...

← էջ 3


Դ—Ե բաժին. «....բացատրութիւն գլխաւոր կանոնաց առողանութեան եւ համաձայնութեան։ Թարգմանութիւն դիւրին հատուածոց ի հայկականէ ի ռուս լեզու» (տե՛ս «Կանոնք եկեղեցական-ծխական ուսումնարանաց հայոց, Վաղարշապատ, 1889, էջ 20—39)։

Սահմանված վերոնշյալ կանոնների շնորհիվ հայկական դպրոցը բռնեց զարգացման մի նոր ճանապարհ։ Երեւան եկան տարբեր տեսակի դպրոցներ, որոնց մէջ, որպէս ազգային կրթության ստորին մակարդակ, տիրապետող դարձավ հայկական եկեղեցական-ծխական դպրոցը։ Դպրոցներ տարածվեցին ոչ միայն Անդրկովկասում, այլ նաեւ Անդրկովկասից դուրս՝ ցարական կայսրության այլ տարածաշրջաններում։ Ս. Էջմիածնի Սինդոքի տվյալների համաձայն՝ 1871 թ. Անդրկովկասում կար մոտ 90 ազգային դպրոց (15-ը՝ իգական)։ Իսկ ըստ Ա. Երիցյանի՝ 1871 թ. արեւելահայ դպրոցների թիվը հասնում էր 138-ի. այս դպրոցների միայն մի մասն էր գտնվում Անդրկովկասում (տե՛ս «Արձագանք», Թիֆլիս, 1882, թիվ 6, էջ 68)։

Այսպիսով՝ եկեղեցական-ծխական դպրոցները պետության կողմից որեւէ օժանդակություն չէին ստանում, արդյունքում որոշ դպրոցներ փակվում էին, եւ խաթարվում էր ուսումնական գործընթացը։ Այնուամենայնիվ եկեղեցական-ծխական դպրոցները ժԹ դարի 60—70-ական թթ. նկատելի առաջընթաց ունեցան եւ մշակավորեցին կրթության զարգացման նոր աստիճան։

Բ. ԹԵՄԱԿԱՆ ԴՊՐՈՑՆԵՐ

ԺԹ դարի՝ մասնավորապէս դարի երկրորդ կեսի, դպրոցների մէջ ամենից բարձ-



րը թեմական էր (հոգեւոր սեմինարիա)։ Այս կարգի դպրոցները բացվել էին դեռեւս 1836 թ.՝ «Կանոնադրության» համաձայն։ «Պոլոժենիեն» թույլատրում էր Ռուսական կայսրության տարածքում գտնվող հայկական վեց թեմում (Նոր Նախիջեւան եւ Բեսարաբիա, Աստրախան, Երեւան, Վրաստան, Ղարաբաղ, Շամախի) ունենալ հոգեւոր սեմինարիա, որը յայտնի է եղել «հոգեւոր դպրոց», «դպրոց», «դպրանոց», «ճեմարան» եւ այլ անվանումներով։ Կանոնադրության համաձայն՝ յուրաքանչյուր թեմ պետք է ունենար մեկ թեմական դպրոց, սակայն, ինչպէս տեսնում ենք, հոգեւոր սեմինարիաներ բացվեցին միայն ստորեւ հիշատակված քաղաքներում։ Այսպիսով՝ ժԹ դարի առաջին կեսին թեմական դպրոցներ բացվեցին հայկական ոչ բոլոր թեմերում. 1837 թ.՝ Երեւանում եւ Թիֆլիսում, 1838 թ.՝ Շուշիում։ Շամախիում 1844 թ. բացված դպրոցը (թեմական) նյութական անապա-

հով պայմաններում հնարավորություն չէր ունեցել զարգանալու եւ դասվելու առավել բարձր կարգի դպրոցների թվին, այդ պատճառով 1886 թ. ընդունված կանոնների համաձայն՝ այն պաշտոնապէս անցավ ծխական դպրոցների շարքը։ Այս դպրոցի պատմությունը շարադրելիս Ս. Խուդոյանը հաղորդում է, որ «1888—1889 ուս. տարվա վիճակագրական տեղեկագրերում մշված է արդեն ոչ թե որպէս թեմական, այլ միայն «տղայոց երկդասեան ուսումնարան»՝ 147 աշակերտով»։ Շամախիի դպրոցը բացվել է 1844 թ., իսկ 1846 թ. Ներսէս Ե Աշտարակեցի հայրապետի (1843—1857 թթ.) կարգադրությամբ փակվել եւ վերաբացվել է 1858 թ.՝ հիշյալ կաթողիկոսի մահից հետո։ 1873 թ. Շամախիի դպրոցն ունեցել է 73 աշակերտ, իսկ 1874-ին՝ 7 ուսուցիչ, 124 աշակերտ, 1895-ին՝ 6 ուսուցիչ եւ 117 աշակերտ։ Դպրոցը փակվել է 1885 թ. եւ վերաբացվել 1886-ին (Ս. Խուդոյան, Արեւելահայ

դպրոցները 1830—1920 թթ., Երեւան, 1987, էջ 457—458)։ 1869 թ. փետրվարին Գեւորգ Դ Կոստանդնուպոլսեցին ընդունեց թեմական դպրոցների կանոնադրությունը (տե՛ս «Արարատ», 1869, թիվ 10, էջ 141—146)։ Կանոնադրության համաձայն՝ թեմական դպրոցներ ընդունվելու էին եկեղեցական-ծխական դպրոց ավարտողները։ Թեմական դպրոցներն ունենալու էին երեք դասարան։ Ժամանակի ընթացքում կրթության պահանջը թեմական դպրոցներին ստիպեց զարգանալ, ընդլայնել առարկաների թիվը եւ ուսուցման որակը։ Դասավանդվող առարկաների թվին ավելացան հայ գրականություն, աշխարհագրություն, ճարտասանություն, ֆրանսերեն եւ այլ առարկաներ, ինչն էլ իր հերթին կանխորոշում էր թեմական դպրոցների հանրակրթական բազմակողմանի ուղղվածությունը։ Վերոնշյալ առարկաներից զատ՝ թեմական դպրոցներում կարեւոր տեղ էր հատկացվում հայագիտական եւ կրոնագիտական առարկաներին. այս առարկաների հետ միաժամանակ պարտադիր դասավանդվում էին ռուսաց լեզու, Ռուսաստանի պատմություն եւ աշխարհագրություն։ Ա. Երիցյանը հիշատակում է, որ «Պոլոժենիեն» պահանջում էր «ի թիւս այլ առարկայից պարտի լինել լեզու ռուսաց եւ պատմութիւն եւ աշխարհագրութիւն կայսերութեան Ռուսաց....» (Ս. Երիցյան, Ամենայն Հայոց կաթողիկոսութիւնը եւ Կովկասի հայք 19-րդ դարում (1831—1842 թթ.), Թիֆլիս, 1889, էջ 582)։

Շարունակելի

**Չաքարա սրկ. ԹԱԴԵՎՈՍՅԱՆ
Աճախիտ ՊԵՏՐՈՍՅԱՆ**

Լոռու մարզի Թումանյանի տարածաշրջանի Օձուն գյուղը ծովի մակարդակից բարձր է մոտ 1125 մ, գտնվում է մարզկենտրոնից գրեթե 50 կմ հյուսիս-արևելք, քաղաքամայր Երեւանից՝ մոտ 175 կմ հեռավորությամբ:

Միջնադարյան Հայաստանի հոգեւոր-մշակութային նշանավոր կենտրոն ու պատմաճարտարապետական գոյություն ունեցող Օձուն գյուղից հարավ-արևելք է մոտ 1,5 կմ: Հռոմայրի հուշարձանախումբը բաղկացած է երկու մասից. ստորին հուշարձանախումբը գտնվում է Դեբեդ գետի ձախափնյա ձորալանջին՝ ուղղաձիգ քարափի տակ: Ստորին հուշարձանախումբ այցելելը համեմատաբար դյուրին է Վանաձոր—Ալավերդի ավտոճանապարհի Քոբեր եւ Սանահին երկաթուղային կայարանների միջեւ գտնվող հատվածից՝ դեպի ձախ վերելք կատարելով կամ էլ վերջերս բացված քայլարշավային արահետով, որն սկիզբ է առնում Օձուն գյուղից մոտ 0,5 կմ դեպի արևելք գտնվող Ծիրանավոր-Ճաղկավանք եկեղեցու մոտակայքից եւ իջնում դեպի Հռոմայրի ստորին հուշարձանախումբ, ապա շարունակվում մինչեւ Քոբայրավանք: Հռոմայրի վերին հուշարձանախումբը գտնվում է բարձունքում՝ սարահարթի պոնկին՝ Ալավերդի—Ստեփանավան ավտոճանապարհի Օձուն—Այգեհատ ճանապարհահատվածից դեպի ձախ՝ մախկին օդնավակայանի մեծակայքում: Վերին հուշարձանախումբն Օձուն գյուղից հարավ-արևելք է մոտ 1.5 կմ հեռավորությամբ:

Հռոմայրի համալիրի ստորին կամ ձորամիջի հուշարձանախումբը բաղկացած է իրար կիպ՝ մեկ շարքում, ոչ մեծ եկեղեցի-զանգակատնից, երկու եկեղեցուց, առանձին գտնվող ժամատնից, մատուռներից, բնակության եւ տնտեսական կարիքների համար հարմարեցված անձավներից ու վիճակոր սենյակներից եւ խաչքարերից:

Հռոմայրի ստորին հուշարձանախմբի վաղագույն կառույցը միջնամասի եկեղեցին է, որին հյուսիսից կից է Սուրբ Նշան եկեղեցի-զանգակատունը, իսկ հարավից՝ մյուս՝ ավելի փոքրածավալ եկեղեցին: Կառույցը երկթեք տանիքով արևելք-արևմուտք ձգվածությամբ թաղածածկ սրահ է, որը հյուսիսից բացված միակ մուտքով հաղորդակցվում է եկեղեցի-զանգակատան հետ: Լույսը թափանցում է արևելյան եւ արևմտյան ճակատներից բացված եւ դեպի ներս լայնացող մեկական լուսամուտներից: Եկեղեցին կառուցված է կրաշաղախով շարված կոպտատաշ, ծակոտկեն բազալտով: Ըստ հորինվածքային, կառուցողական, ծավալատարածական առանձնահատկությունների վերլուծության՝ եկեղեցին մոտավոր թվագրվում է ԺԲ դարի կեսով:

Հռոմայրի կենտրոնական եկեղեցուն կից Սուրբ Նշան եկեղեցի-զանգակատունը պայտածե խորանով թաղակապ դահլիճ է: Արեւմտյան պատն անմիջականորեն թիկնած է ժայռին, ստորին հատվածում շարված են նրբաքանդակ խաչքարեր: Արեւմտյան պատի միջին մասից դուռ է բացվում դեպի ժայռափոր, շրջանաձեւ հատակով անձավը: Պատակը պատված է տապանաքարերով: Պատերը շարված են սրբատաշ բազալտաքարերով: Միակ՝ հյուսիսային մուտքն ունի սլաքածե վերջավորությամբ ոչ խոր փորված եզրակալ, որի երկու կողմերում՝ առդիր քարերի վրա, վարպետորեն պատկերված են հրեշտակներ՝ ամբողջ հասակով, ձեռքներին՝ խաչեր: Բարավորի հարթության վրա Քրիստոսի դիմաքանդակն է՝ ներքեւում գոտեւորված զույգ դափնետերևով: Աջ ձեռքը բարձրացրած է, իսկ ձախ ձեռքին Ավետարան է՝ երկու կողմերում համապատասխանաբար 3[իսուս] Քրիստոս մակագրությամբ: Ըստ ավանդության՝ այստեղ է պահվել Հովհան Օձնեցու (Իմաստասեր, Հովհաննես Գ Օձնեցի, Հայոց կաթողիկոս՝ 717—728 թթ.) վանքին նվիրած Սուրբ Նշանը՝ Քրիստոսի խաչափայտի մասունքը, որի պատվին էլ եկեղեցի-զանգակատունը, իսկ հետագայում նաեւ ամբողջ վանական համալիրը կոչվել է Հռոմայրի Սուրբ Նշան կամ Սուրբ Նշան (Սրբինշան): Պահպանված շինարարական արձանագրության համաձայն՝ եկեղեցին 1187 թ. կառուցել կամ հիմնովին վերաշինել են Զա-




Քարայրից բացվող տեսարան

Հռոմայրի Ս. Նշան վանք



Արձանագրություններով պատված ժայռ




Արձանագրություն

քարե եւ Իվանե Զաքարյանները: Եկեղեցի-զանգակատան խորանի անկյունային մասերի եւ արեւմտյան պատի պահուսնակների վրա հենված չորս որմնակամարները պահում են թաղածածկը եւ հետագայում (1290 թ.) կառուցված զանգաշտարակը, որն ունի ութ սյուն՝ մեկընդմեջ ութանկյուն եւ քառակուսի կտրվածքներով, որոնց վրա խարսխված են դեղնավուն ֆելզիտե սլաքածե կամարները:

Եկեղեցու շուրջ տարածված գերեզմանոցում պահպանվել են մի քանի գեղաքանդակ խաչքարեր ու տապանաքարեր: Գեղարվեստական հարդարանքով աչքի է ընկնում 1201 թ. կերտված «Տերունական» խաչքարը: Առանձնակի արժեքավոր է նաեւ խաչքարերից մեկը, որի պատվանդանի երեք միստերին փորագրված ընդարձակ արձանագրությունը բովանդակությամբ պայմանադրությամբ է:

Հարավից կենտրոնական եկեղեցուն մոտ է եւս մեկ եկեղեցի (պայմանականորեն՝ Հարավային), որն առավելապես մատուռ է: Հարավային եկեղեցին քառակուսածեւ համաչափություններով թաղակապ դահլիճ է, որի ծածկը պահելու համար միջին եկեղեցու հարավային պատին կից



Արձանագրություն եկեղեցու բարավորին

դրվել է նոր պատ: Եկեղեցու միակ՝ արեւմտյան մուտքի բարավորին պահպանված արձանագրությունից տեղեկանում ենք, որ եկեղեցին 1201 թ. կառուցել են Հակոբի եւ Խալիի որդիները՝ Սարգիսն ու Զաքարեն: Եկեղեցին կառուցված է սրբատաշ խոշոր բազալտաքարերով ու կրաշաղախով: Լուսավորվում է արեւելյան ճակատին գտնվող եւ դեպի ներս լայնացող պատուհանից:

Ս. Նշան եկեղեցի-զանգակատնից մոտ 25 մ հյուսիս գտնվում է Ս. Աստվածածին ժամատունը, որն ընդարձակ սրահ է՝ հյուսիս-հարավ ձգվածությամբ: Արեւելյան միջին մասում ունի ներքուստ կիսաշրջանաձեւ, արտաքուստ՝ ուղղանկյուն եզրագծով ու նեղ պատուհանով խորան, որի ճակատին փորագրված արձանագրության համաձայն՝ ժամատունը 1301 թ. կառուցել է Իզմատիոս վարդապետը: Խորանի եզրային պատերին կան մեկական լայն պատուհաններ: Ունի երկու մուտք՝ հյուսիսային եւ հարավային կողմերից: Արեւմտյան կողմից որպես պատ է ծառայել ուղղաձիգ կտրված ժայռը: Արեւելյան պատի ստորին շարքը, խորանի կամարը եւ մուտքերի եզրակալները սրբատաշ, իսկ մյուս պատերը կոպտատաշ բազալտաքարերով են շարված:

Ներսուն՝ խորանի պատին, նկատվում են որմնանկարների հետքեր: Քանի որ Ս. Աստվածածին ժամատան ծածկը չի պահպանվել, ենթադրվում է՝ այն եղել է փայտաշեն: Արեւելյան ճակատին բացված է երեք լուսամուտ: Ժամատնից քիչ հեռու պահպանվել են մատուռի (1216 թ.) ավերակներ:

Հռոմայրի վանական համալիրի ստորին կամ ձորամիջի հուշարձանախմբին արեւմուտքից հարող ժայռի տարբեր հատվածներում պատրաստվել են վիճակոր սենյակներ ու խցեր՝ ամրացված պատերով: Խցերի մի մասը ծառայել է իբրեւ ճգնառան: Ժայռափոր կառույցների մեջ առանձնանում է հարավարեւմտյան ժայռի միջին մասում գտնվող վիճակոր մատուռը: Ստորին հուշարձանախումբն աչքի է ընկնում շրջակա միջավայրի հետ վարպետորեն ներդաշնակվածությամբ: Ս. Նշանից ներքեւ Թնդոցի ձորն է, ուր գտնվում է անուշահամ, հորդառատ Թնդոց աղբյուրը, որը բխեցնելու հրաշքն ավանդաբար վերագրվում է Ս. Հովհաննես Գ Օձնեցի կաթողիկոսին:

Հռոմայրի համալիրի վերին կամ ձորեզրի հուշարձանախումբը բաղկացած է իրար կից մի զույգ թաղածածկ եկեղեցիներից եւ նրանց միջեւ համաչափորեն տեղադրված գավթից ու եկեղեցիների արեւմտյան կողմում տարածված միջնադարյան գերեզմանոցից, ուր կան նաեւ նոր ժամանակների տապանաքարեր:

Ձորեզրի հուշարձանախմբի հնագույն կառույցը հարավային եկեղեցին է (Ծիրանավոր Սուրբ Նշան), որը կիսազանգածե թաղածածկով ուղղանկյուն դահլիճ է՝ առնված երկլանջ կտուրի տակ: Պայտածե խորանը գմբեթադրի սահմանագծով եզերված է պարզ տրամատի գոտիով, որը շարունակվում է նաեւ երկայնական պատերին: Արեւելյան պատուհանի պսակը զարդարված է դեմ հանդիման կանգնած ու զլուխները հետ գցած աղավթների քանդակով: Եկեղեցին կառուցված է կապտավուն բազալտի սրբատաշ քարով:

Ըստ մուտքի որմնակամարի վրա պահպանված արձանագրության՝ եկեղեցին 1206 թ. կառուցել է վանքի առաջնորդ, վանահայր Սամուելը: Արեւելյան պատուհանի բարավորի վրա հավերժացած է կառուցող Գրիգոր վարպետի անունը:

Ձորեզրի հուշարձանախմբի հյուսիսային եկեղեցին ունի մույն հատակագծային հորինվածքը՝ չափերի տարբերությամբ: Եկեղեցին կառուցված է դեղնաշագանակագույն ֆելզիտով, մուտքը հյուսիսային կողմից է եւ բացվում է գավթի մեջ: Արեւմտյան ճակատն ամբողջությամբ պատված է խաչքանդակներով:

Երկու եկեղեցիների միջեւ կառուցված գավթից քառակուսածեւ հատակագծով սրահ է՝ ծածկված անկյունագծային դասավորությամբ, փոխհատվող կամարներով ուժեղացված թաղով: Թաղակամարի վրա՝ փականաքարի երկու կողմերում, քանդակված է հավերժության խորհրդանիշ ու բազմաթիվ վարդակ: Գավթից ձորեզրի հուշարձանախմբի առավել ուշագրավ կառույցն է եւ կառուցվածքային տվյալներից դատելով՝ հյուսիսային եկեղեցու հետ միասին հարավային եկեղեցուն է կցվել ավելի ուշ՝ հավանաբար ԺԳ դ. կեսին՝ իրար միացնելով հարավային եւ հյուսիսային եկեղեցիները: Գավթի՝ քանդակագարդ շրջանակով եզերված եւ բավական լայն մուտքն արեւմտյան կողմում է: Երկու եկեղեցիների մուտքերը գավթի կողմից են: Գավթից չունի պատուհաններ, կառուցված է ֆելզիտե սրբատաշ քարով:

Թեւեւ Հռոմայրի վանական համալիրը բաղկացած է իրարից բավական հեռու գտնվող ձորամիջի եւ ձորեզրի հուշարձանախմբերից, Հռոմայրն այնուամենայնիվ մեկ միասնական հոգեւոր-մշակութային համալիր է:

2017 թ. Հռոմայրի վանական համալիրի ձորեզրի հուշարձանախումբը վերանորոգվել է ՀՀ Լոռու մարզպետ Արթուր Նալբանդյանի եւ Թումանյանի տարածաշրջանի լեցանդի պետ Աշոտ Շաքարյանի մեկենդանությամբ: Հուշարձանախմբի վերականգնման նախագծի հեղինակն է ճարտարապետ Սուրեն Աբովյանը:

Շարունակելի

Արման ՄԱՆՈՅԱՆ
Պատմական գիտ. թեկնածու

Մեր վարդագույն բարեկամը

Մառնանուտից մինչև օգոստոսի սկիզբն Արարատյան հովտի, Արագածոտնի, Կոտայքի, Վայոց ձորի եւ Սյունիքի մարզերի այգիներում ստեպ-ստեպ որոտում են որսորդական հրացաններ, որոնց մահաբեր փողերն ուղղված են այնպիսի օգտակար թռչնի վրա, ինչպիսին վարդագույն սարյակն է: Կոպտորեն խախտելով որսի կանոնները՝ ոչնչացվում է մեր բնության գողտրիկ այդ փետրավորը՝ հայ գյուղացու դարավոր բարեկամը:

Հին Հայաստանում սուրբ թռչունն այսօրվա Հայաստանում ոչ միայն անտեսված ու մոռացված է, այլևս դրանց սպանում են... անարգել...

Վաղ մանկության իմ առաջին զարմանքներից մեկը Ոսկեվազ-Օշականի մեր ձորահովտի թռչններին լցված անթիվ-անհամար վարդագույն սարյակներն էին՝ «թթի դշերը»: Որքան շատ էին, երբեմն՝ տասնյակ հազարների հասնող: Օրն ի բուն համերգում էին՝ թուփ անուշ անելիս կամ վիթխարի ընկուզենիների զովասուն սաղարթներում հանգստանալիս: Իսկ թե հանկարծ մի տեղ հրացան որոտար, ծ, խուճապահար թռչուն, խճճվում էին օդում, երկինքը ծածկում հսկա ամպի պես:

Բնական մետաքսի հունքի արտադրության պետական առաջադրանք ունեին կոլտնտեսություններն ու խորհրդային տնտեսությունները, անհատները, եւ շերամապահության համար գրեթե ամեն գյուղում հեկտարներով թթաստաններ կային: Մայիս ամսվա ընթացքում թթնու մատղաշ տերեւներով առատորեն կերակրում էին շերամորդերին եւ նույն ամսում ավարտում գործը:

Ընդամենը քորոցի գլխի չափն ունեցող շերամորդի թրթուրը թթնու կաթնոտ տերեւներով սնվում, աճում, դառնում էր մատնաչափ՝ տուռը մարմինը ծայրեծայր լցված թանձր հեղուկով: Դրանով այդ բնապարզեւ, անխոնջ աշխատավոր միջատն օրն ի բուն սպիտակ, մրբաթել բոժոժ էր գործում, ինքը սպառնում, սմբում, թիթեռի հարսնյակ դարձած՝ պատսպարվում նույն բոժոժի մեջ, մինչեւ...

Բնական մետաքսի արտադրության հունքը հենց այդ թանկարժեք բոժոժներն էին, որ տոննաներով վաճառվում էր պետությանը, եւ որով ամբողջ տարին աշխատում էր երեւանի մետաքսի գործարանը (նույնը՝ Ստեփանակերտում...):

Բնական, գեղեցիկ, ամուր ու թեթեւ կտորները շուտով դառնում էին մրբագեղ, պերճ հագուստներ, որոնք մարդիկ կրում էին հաճուքով:

Բնական մետաքսը, ի դեպ, օգտագործվում է եւ այլ բնագավառներում, անգամ տիեզերքում:

Շերամի եւ բնական մետաքսի հիմնավորը հայրենիք Չինաստանն այսօր եւս աշխարհի առաջատարն է...

...Դեռ թուրք չհասած՝ մեր երկիր էին «ժամանում» վարդագույն սարյակի բյուրավոր երամները: 1970-ականների սկզբներին տեղական մարմինները եւ նրանց վերադասները որոշեցին ազատվել շերամապահության ճյուղի «գլխացավանքից» եւ «տրակտոր-բուլդոզերներով» անգթորեն արմատախիլ արեցին հարյուրավոր հեկտարների հասնող կանաչավետ, բերք ու բարիքի աղբյուր այն հրաշալի թթաստանները եւ հայտնի խոսքի հանգույն՝ «տեղը վարեցին, բոստան ցանեցին»: Բանաձեւը պարզ է՝ չկա թթնի, չի կարող լինել նաեւ շերամապահություն...

Դավին անտեղյակ՝ հարավից, ամեն տարվա պես, կրկին եկան թթասեր սարյակները: Անակնկալ. եկան եւ... սովի մատնվեցին: Կեր ճարելու համար ճարահատյալ դեգերեցին ամենուր, անահ խուժեցին տնամերձ այգիները, հարկադրված «զբաղվեցին» կեռասի, ծիրանի, մինչեւ իսկ կիսահաս խաղողի կողոպուտով:

Հաջորդ տարիներին, բնականաբար, խիստ պակասեց վարդագույն սարյակների քանակը, իսկ վերջին տարիներին՝ առավել: Եվ դեռ այսօր կան մարդիկ, որոնք արձճե գնդակներով են դիմավորում Հայաստան-



նում արդեն խիստ սակավաթիվ դարձած այդ օգտակար թռչուններին:

Արդեն կես դար է, ինչ չէ՛մ կրակել սարյակի վրա, ճիշտ այն պահից, երբ գրականության միջոցով առավել մանրամասն ծանոթացա այս օգտակար թռչնի վարք ու բարքին: Ինձ եւ ինձ նման հազարավորների սարյակի վարդագույն «կերպարին» հանգամանորեն ծանոթացրել է մեր բնության անգերազանցելի գիտակ, որսորդ եւ գրող Վախթանգ Անանյանը՝ թե՛ բանավոր զրույցներով, թե՛ հրապարակախոսական հոդվածներով եւ թե՛ «Տարմահավ կամ վարդագույն սարյակ» ուսումնասիրությամբ: «Հայաստանի կենդանական աշխարհը» աշխատության չորրորդ հատորի հիշյալ գլուխը նույնպես գրվել է բնախույզի, բարեխիղճ ուսումնասիրողի եւ որսորդի խորին իմացությամբ: Սարյակի մասին անվանի գրողի ջերմ տողերն ընթերցելուց հետո բանական, հայրենի բնաշխարհը սիրող, փոքր-ինչ որսորդական բարոյականություն ու խիղճ ունեցողը հազիվ թե այլեւս զենք ուղղի 65–80 գրամանոց գեղեցիկ եւ անչափ օգտակար այդ թռչնակի վրա:

Աշխատության մշված գլուխն սկսվում է այսպես. «Հայ գյուղացին փետրավորների աշխարհում ունի իր դարավոր բարեկամները, մտերիմները, սիրո արժանի արարածները: Եվ դրանցից մեկն էլ վարդագույն սարյակն է»: Անվիճելի է, որ համակրանքը թռչնի նկատմամբ գալիս է հազարամյակների խորքից. չէ՛ որ «այդ փոքր թռչունը մեծ դեր է խաղացել մեր հողագործ նախնիների կյանքում», մանավանդ որ «մեր երկիրը պարբերաբար ենթարկվել է մորեխի ահավոր ավերածությունների»:

Հայ մատենագիրներից Մատթեոս Ուռնայեցու վկայությամբ՝ 954 թ. եկավ մորեխը՝ «...որպես աւագ զծովու եւ ապականեաց գերկիրը: Եւ սաստկանայր սովն առաւել...»: Անասունները մորթվեցին, այնուհետեւ խելահեղության հասած մարդիկ զազանաբար հարձակվում էին միմյանց վրա... Բազմաթիվ գյուղեր եւ գավառներ դարձան անմարդաբնակ:

Այսպիսի հուսահատական պահերին հայ գյուղացուն օգնության է հասնում հին ու հավատարիմ բարեկամ վարդագույն սարյա-

կը (գիտական անվանումը՝ Pastor Roseus), որին «տարմահավ», «մորեխածիտ», «Սուրբ Յակոբայ դուշ» են անվանել, իսկ այսօր շատերը խոսակցական լեզվով՝ «թթի դուշ»: Պատմությանը դեպքեր են հայտնի, երբ այդ թռչունները հոծ բազմությամբ նետվել են մորեխի պարսերի վրա, կոտորել, ոչնչացրել են աղետաբեր այդ միջատների «ամպերը», ժողովրդին փրկել վերհաս սովից:

Մորեխասպան վարդագույն սարյակի մասին հիշատակություններ կան Եկեղեցու մշանավոր հայր Բարսեղ Կեսարացու, առաջին հայ կենդանաբան Աբրահամ քահանա Պոլսեցու, գերմանացի գիտնական, Դորպատի համալսարանի պրոֆեսոր Ֆրիդրիխ Պարրոտի, ռուս կենդանաբան Կ. Սատունիցինի եւ այլոց աշխատություններում: Բարսեղ Կեսարացին նկատել է, որ երամներով շրջող թռչուններ կան, որոնք երկրեղկի եւ տեղափոխվում «համագունդ» խմբերով (տարմերով), որոնցից են տարմահավերը, եւ թե «ինչպես Աստված Իր մարդասեր զորությամբ ստեղծեց այդ փոքր թռչունների արագահալ (արագ մարտող՝ Մ. Մ.) կտմնաքը եւ արագաթռիչք անցումները՝ մարդուն հասնելու համար»:

Եվ բնական է, որ մեր նախնիները պետք է մեծարեին իրենց սովամահությունից փրկող թռչնին, եւ սարյակը հնում պաշտամունքային թռչուն է եղել: Մինչեւ վերջերս Արարատյան դաշտի եւ մեր շատ այլ շրջանների բնակիչները սուրբ են համարել Մասիսի ստորոտում՝ Ակոռի գյուղի մոտ գտնվող Ս. Հակոբա վանքի շրջակայքից եկող սարյակներին:

1829 թ. պրոֆեսոր Ֆ. Պարրոտի հետ Արարատի գագաթը հասած հայ մեծ գրող եւ լուսավորիչ Խաչատուր Աբովյանը հետագայում նկարագրել է արշավախմբի դադարի տեղը՝ Ակոռի գյուղը, որտեղ «....գտնվում է այն աղբյուրը, որի զորության մասին մեծ հավատ ունեն Անդրկովկասի բոլոր բնակիչները: Երբ մորեխն ամայացնում է արտերը, նրանք վազում են այս աղբյուրը, ջուր վերցնում սրբազան հանդիսավորությամբ, շաղ տալիս այն վայրերում, որոնց վրա հարձակվել է մորեխը: Շուտով երեսում են սարյակները... ոչնչացնում այս վնասակար միջատներին»:

Արարատի կենդանական աշխարհն ուսումնասիրող Կ. Սատունիցը դեռեւս 1907 թ. նկարագրել է, թե վարդագույն սարյակը ժողովրդի շրջանում որքան մեծ հարգանք ունի, քանզի ամենուր հետեւում է մորեխի խմբերին եւ ոչնչացնում է դրանց շատ ավելի, քան կարող է ուտել:

Վ. Անանյանը 1924 թ. ամռանը Գորիսի եռաբլուր կոչվող հանդամասում ցնցող տպավորություն է ստացել «այդ զարմանալի թռչնի զարմանալի արարքից»: Այստեղ Աֆրիկայից եւ այլ երկրներից հայտնված միլիոնավոր միջատների ոչնչացնելու համար հավաքում են ողջ ժողովրդին, հաս-

կերն ու կանաչ ծածկույթն արագորեն խժռող մորեխներին ավում, լցնում են փորած խրամատները, ծածկում հողով: Դաշտում մորեխները կույտ-կույտ են եղել եւ այնքան շատ, որ լցվել են մարդկանց իրերի մեջ, ոչնչացրել ուտելիքը, հագուստը ծվեն-ծվեն արել, իսկ երբ թռչուն էին, ցերեկը մթնշաղի նման մռայլվում էր: «Բայց ահա,— գրում է ակադեմիկ Վ. Անանյանը,— հարավից եկող մի թուփ ամպ արեգակի առաջը պատեց, եւ հազարավոր թռչուններ, սվինամարտի գնացող զինվորների նման վաշտ առ վաշտ գրոհեցին թշնամուն, խցկվեցին նրա մեջ, խառնվեցին նրան, ու սկսվեց կոտորածը, ինչ կոտորած... Բերկրանքի ձայներ լսվեցին ժողովրդի միջից... Թռչունները չէին խորշում մարդկանց ներկայությունից, կարծես նրանց էին հասնում մարդկանց սերն ու հիացմունքը... Զարդված միջատների փորոտիքից աղտոտված թռչունները գնում էին մոտիկ Որոտանի ջրերում լողանում, մաքրվում եւ հետ գալիս... Պատկերացնում եք անընդհատ գործող հարահուսը... Մտածում էի, թե գայլն իր ագահությամբ չունի նմանը, քանի որ կոտորում է շատ ավելի, քան կարող է լափել: Ինչ գայլ, ինչ բան՝ գայլի համեմատ այս թռչնի ագահությունը մորեխի նկատմամբ նմանը չունի կենդանական աշխարհում... Կարծես վրեժ էին հանում մարդկության փոխարեն, սովի մատնված երեխաների փոխարեն...»: Սարյակներն այնքան նվիրումով են զբաղվել մորեխների ոչնչացմամբ, որ անգամ «մոռացել են» իրենց ձվադրման ժամկետները...

Շարունակելի

Սերժ ՄԱՆՈՒԿՅԱՆ

ՔՐԻՍՏՈՆՅԱ ՅԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»

թերթի խմբագրություն

Գլխավոր խմբագիր՝

Արփիմե Չանթիկյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/kristonya-hayastan

Ստոր. տպագր. 19.07.2023 թ.

Տպաքանակը՝ 1265